


妙法蓮華經指掌疏

卷一之下

B8
2057
T85
1749a
v. 5



法華指掌疏卷一之下

真宗後學通理述 嗣法門人明鑑較字

京西潭柘山岫雲寺監院比丘來琳督刊

二正宗分

明權實本迹之正義示開顯會歸之宗旨自方便至神力共二十品皆正宗之

文分二

一約今時門頭以彰出世本懷

今時門

不少故有三時設化五教被機之別若原佛出世本懷無非開權顯實會三歸一自此以去至安樂

行品至

二約實際理地以顯應化妙用

實際理地

彰此也

由一法不立故能顯現諸法所以非生現生非滅現滅三世益物化化不絕自地湧至神力品全顯

其初二

一畧明權實以動執生疑二廣明權實

以斷疑生信三極顯聖功以借人弘法

初此處

法華指掌疏卷一之下

賢宗後學通理述 嗣法門人明遠較字

京西潭柘山岫雲寺監院比丘來琳督刊

二正宗分

明權實本迹之正義。示開顯會歸之宗旨。自方便至神力。共二十品。皆正宗之

文也。分二

一約今時門頭以彰出世本懷

今時門頭。一法

不少。故有三時設化。五教被機之別。若原佛出世本懷。無非開權顯實。會三歸一。自此以去。至安樂

行品。全彰此也。

二約實際理地以顯應化妙用

實際理地。一法不立。

由一法不立。故能徧現諸法。所以非生現生。非滅現滅。三世益物。化化不絕。自地湧至神力品。全顯

此也。初三

一畧明權實以動執生疑二廣明權實

以斷疑生信三極顯經功以借人弘法

初此處有通

卷品題應先
釋之。品題云。

妙法蓮華經方便品第二

品雖居此義攝卷終。今通前後以釋方便。方者一定不易之體。便者應物隨緣之用。各論則方卽實也。便卽權也。此品從始至終。無非發明權實。故以方便名之。若合論者。方便謂從方起便。惟從便稱。卽常途所釋權巧義也。通論此品。畧有五重權巧。一謂文殊彌勒。酌酢已畢。衆無能問。權巧自說故。二謂權執不動。實疑不生。讚嘆稱揚。權巧激發故。三謂法不可示。言詞相寂。分別解說。權巧酌請故。

四謂權實之旨。不易發明。述自述他。權巧開示故。
五謂法說一周。身子得記。實爲中下。權巧作則故。
總論此經一言一句。俱自大悲心中流出。通爲攝
生。無非權巧。故初以方便名品。令知從始至終。皆
屬方便。幸莫作文字觀也。此是通卷品題。本科經文分二。

一畧明權實二動執生疑 初二 一長行二偈

頌 初二 一約佛慧稱嘆二約諸法顯示 初

二 一嘆諸佛智慧二嘆自證智慧 初二 一

標嘆二智二依次釋成 初

爾時世尊。從三昧安詳而起。○告舍利弗。諸佛智慧。

甚深無量。其智慧門難解難入。一切聲聞辟支佛所不能知。

初經家敘儀。爾時者。彌勒文殊問答已竟之時也。玄機旣洩。無容再默。故從三昧而起。言安詳者。謂整涅槃僧。歛僧伽黎。有申申天天。從容不迫之貌。○告舍下。正以標嘆。告謂詔而語之。卽無問自說之義。獨告身子者。以身子願學菩薩。不安小乘久矣。準後不預斯事。甚自感傷等語可見。又舍利表權智。今欲會權歸實。故獨告之。諸佛者。總指十方三世。如法說章中所引。智慧卽平等大慧。衆生迷

之。而諸佛證之。故云諸佛智慧甚深者。窮諸智之
淵底。諸智莫能窮其底故。無量者。盡諸智之分量。
諸智無能盡其量故。此是標嘆實智。約自覺言也。
門謂權智。能通實智。故云其智慧門。難解者。權不
終權。若執權者。是未解權之義故。難入者。權能通
實。若迷實者。是未入權之極故。此是標嘆權智。約
覺他言也。聲聞辟支所不知者。如華嚴悶絕躡地。
阿含日價爲足。方等常除糞穢。般若無希一食等。
此是兼嘆權實。約覺滿言也。若論覺滿。仍揀菩薩。
今獨揀聞緣者。以今經爲破權執。而聞緣猶重。急

先務也。標嘆二智竟。二依次釋成。

所以者何。○佛曾親近百千萬億無數諸佛。盡行諸佛無量道法。勇猛精進。名稱普聞。成就甚深。未曾有法。隨宜所說。意趣難解。

首句承前徵起。言上來智慧及門。所以聞緣不知者何也。○佛曾下。正以釋成。親近諸佛者。如不輕之於威音。妙光之在燈明。培來者遠故。盡行道法者。如一音徧記。增壽說經。奉持法藏。廣宣法華等。積來者厚故。勇猛者。雖近多佛。不以時長自諉。精進者。雖行多法。不以行滿自足。所謂經刳石以忘。

疲戴鐵輪而不退也。名稱普聞者。建志之深。聲名
洋溢之義。然既至聲名洋溢。而內證實德。自應甚
深。未有故云成就。此釋諸佛智慧甚深無量義也。
隨宜所說者。由實智甚深無量。爲度衆生。隨其機
宜而演說之。所謂從實施權是也。然所說之法。雖
屬隨宜。而意趣在實。是諸佛之密意。故云難解。此
釋其智慧門難解難入義也。二智若此。豈聲聞辟
支所能知哉。嘆諸佛智慧竟。

二嘆自證智慧二 一總顯具足二分文別嘆

初

舍利弗。吾從成佛已來。種種因緣。種種譬喻。廣演言教。無數方便。引導衆生。令離諸着。○所以者何。如來方便。知見波羅密。皆已具足。

初指法不盡。成佛已來。指華嚴以後時也。華嚴以後。法華以前。中間逐機所說。入道因緣不同。故云種種因緣。間或根器鈍劣。於因緣中仍不了者。又復喻以易知。譬以易見。故云種種譬喻。廣演言教。無數方便者。以一乘開爲三乘。隨機差別。方便各異。故引導衆生。令離諸着者。如凡夫着有。佛說空以引之。二乘着空。佛說有以導之。據此則從前所

說但以衆生處處着引之令得出。豈足以盡佛之智哉。○所以下顯智具足。初徵起者。言從前所說似已盡佛智矣。所以但言引衆離着者。何也。如來下雙舉二智以釋成之。方便卽是權智。知見卽是實智。二俱究竟。故總以波羅密稱之。皆已具足者。正顯從前所說不能盡也。

二分文別嘆

舍利弗。如來知見廣大深遠。無量無礙。力無所畏。禪定解脫三昧。深入無際。成就一切未曾有法。○舍利弗。如來能種種分別。巧說諸法。言辭柔軟。悅可衆心。

初嘆實智具足。如來知見者。自舉所證實智。廣大者。橫而論之。具足一切諸功德故。深遠者。豎而論之。窮盡衆德之淵底故。無量無礙等者。轉釋嘆詞。無量。謂四無量心。一慈。二悲。三喜。四捨。無礙。謂四無礙辯。一法。二義。三詞。四樂說力。謂十力。始於是處。非處。終至漏盡。無能勝。無能壞。故名力也。無畏有四。一一切智無畏。二漏盡無畏。三說障道無畏。四說苦盡道無畏。通名無畏者。於大衆中。廣說自他智斷。無恐懼故。禪定如八背九次。乃至妙奢摩他。三摩禪那。解脫如空。無相。無願。乃至不可思議。

解脫境界。三昧如二十五王。乃至首楞嚴王。於此
差別功德。徹底窮源。故曰深入無際。無際者。既已
窮源。更無餘際。所謂知見深遠者。此也。一切者。仍
指如上所說。一切智至佛智。皆名自覺聖智。一切
法至佛法。皆名究竟果法。故俱稱未有。一一圓滿
具足。故曰成就成就者。卽圓滿具足之義。所謂知
見廣大者。此也。問。既釋實智。應屬自覺證極。觀無
量無礙無畏之名。似兼覺他。而八
背九次三解之義。似未證極。用斯釋實。得無議乎。
答。恒沙性德。皆悉具足。方名實智。若實智中原不
具此。則施權時。却從何而來耶。○舍利下嘆權智具足。種種分別
者。曲抑本懷。隨他意語。巧說諸法者。權設三乘。巧

逗群機。不有權智。何以能爾。今如來自謂能者。正見其權智具足之義。末二句轉釋嘆詞。言辭柔軟者。善順物情。由此故能種種分別。悅可衆心者。觀機逗教。由此故能巧說諸法。蓋此卽權智具足之用耳。約佛慧稱嘆竟。

二約諸法顯示

前恐固執先聞。故約佛慧稱嘆。令知若權若實。俱未究竟。還須向上

追求。此恐高推聖境。畫地自限。故約諸法顯示。令知法法頭頭。無非權實。只要目前薦取。是知前後無非是藥。應症便可取服。幸勿醫門緘口。以待自斃可也。分三 一取要絕言

二徵起釋成三轉釋釋詞 初

舍利弗。取要言之。無量無邊。未曾有法。佛悉成就。○

止。舍利弗不須復說。

初取要顯證權實之法。頭頭皆是。擬欲盡言。言不能盡。故曰取要言之。無量者。豎無限量。無邊者。橫無邊際。如許未曾有法。如來一一圓滿。故云佛悉成就。此卽取其提要者言之。○止舍下。絕言不說。止猶罷也。欲罷而不說也。佛以二乘人等。只知隨語生解。不解言外明宗。故用無量無邊等語而啟發之。見其如鳥待哺。如渴思水。乃急以止之。亦仲尼所謂子欲無言之意。不須復說者。以說之無益故。

二徵起釋成

所以者何。○佛所成就第一希有難解之法。惟佛與佛。乃能究盡諸法實相。

初句徵起。言旣云未曾有法。佛悉成就。亦當畧示義相。所以止而不說者。何也。○佛所下釋成。世法無非佛法。惟佛證知。故云佛所成就。佛法無非世法。衆生迷昧。故云第一希有。一切見色聞聲。頭頭錯過。故云難解之法。了知翠竹黃華。般若真如。故曰惟佛究盡。然必究盡諸法。則權智究竟。究竟盡實相。則實智圓滿。除佛與佛。孰能及此。所以止而不

說者此也。

三轉釋釋詞

所謂諸法如是相如是性如是體如是力如是作如是因如是緣如是果如是報如是本末究竟等。

所謂二字。召下釋上之詞。謂召下如是等義。釋上惟佛能究語也。如是者。指法之詞。相性體力等。正所指之法。情與無情。一切皆具。故約諸法言之。釋義則依性名相。如有情之身軀。無情之質本。性所持故。持相名性。如有情之元明。無情之元氣。相所依故。別相名體。如有情之手足。無情之根莖。相所

屬故。功能名力。如有情之執捉運奔。無情之擎載支持。體所具故。業用名作。如有情之賢奸善惡。無情之家野真偽。力所成故。親生名因。如有情之善惡。因種。無情之真偽。子實。作所積故。助發爲緣。如有情之父精母血。無情之土膏雨潤。種所托故。成就名果。如有情之色身圓滿。無情之內外具足。緣所生故。好醜名報。如有情之否泰窮通。無情之輕重貴賤。果所受故。初相爲本。後報爲末。究竟無二。同一實相真體。故云等也。以上共有十箇如是。若於前九一一了知。是究竟諸法。若於後一確確體。

證是究盡實相。上云惟佛與佛乃能究盡者。此耳。
然此以上三科。雖顯佛智究竟實明。世法無非佛
法。既世法無非佛法。則一切法無非是權。一切法
莫不顯實。乃如來格外方便。向上提持。敷聲教於
六根門頭。明權實於萬化之域。曉了此者。則隨宜
所說。意趣難解之旨。不待言矣。問。十如是中。性義
似指真體。何故以
等義為實相乎。答。性約諸法各具之性。等指諸法
同歸之體。雖四河俱名為水。不得稱海。必眾水所
歸者。乃名為海。故
以等義為實相也。長行竟。

二偈頌

標頌
云

爾時世尊欲重宣此義而說偈言。

正頌
分三

一正頌長行二極顯難知三畧爲顯破 初二

一頌約佛慧稱嘆二頌約諸法顯示 初二 一

頌嘆諸佛智慧二頌嘆自證智慧 初二 一頌

標嘆二智二頌依次釋成 初

世雄不可量諸天及世人一切衆生類無能知佛者。佛力無所畏。解脫諸三昧。及佛諸餘法。無能測量者。諸佛二智究竟。超出世出世間。故稱世雄。雄猶長也。不可量者。亦以所證究竟而言。謂所證之智。旣已究竟。能證之人。詎可限量乎哉。諸天及世人者。天人居九界之中。故獨舉之。此外上有三聖。下有

四凡。總以一切衆生該之。古德云。等覺不知妙覺。况復餘衆。故總云無能知者。此是約義超頌。聲聞辟支所不能知之文。佛力無所畏等。俱屬佛知見中。差別功德。借此以頌諸佛智慧句也。佛諸餘法。頌上其智慧門。以權智之中。亦有無量差別法故。無能測量。合頌甚深無量難解難入義也。問。長行但云。聲聞辟支不知。今云。諸天及人。一切衆類。無能知者。何。長行偈頌。寬嚴之不同耶。答。六凡始種。菩薩將脫。聞緣正熟。前爲先務。當急。故獨舉聞緣。此爲佛慈宜普。故亦兼餘衆。總爲激其情志。發起勝心。以造乎能知。之域而已。頌標嘆二智竟。

二頌依次釋成

畧頌

本從無數佛具足行諸道甚深微妙法難見難可了。
於無量億劫行此諸道已道場得成果。

本從句。頌上親近諸佛具足句。頌上盡行道法甚
深微妙。指上實智而言。初得相應曰見。既獲大徹
曰了。言雖久近多佛盡行道法。於此甚深微妙之
法終未相應。終未大徹。故云難見難可了也。億劫
行道二句。頌上勇猛精進。非勇猛精進者不能經
劫行道故。不頌名聞者。建志之深。立行之固。聲名
自然洋溢。故畧之也。道場成果。頌上成就甚深未
曾有法。不頌隨宜所說。意趣難解者。實必具權。不

言可知故。頌嘆諸佛智慧竟。

二頌嘆自證智慧

一句之頌。攝長行全科之文。畧頌也。

我已悉知見。

如來自謂。如彼諸佛所證。我已悉知悉見。蓋將他顯已。令比例而知故。頌約佛慧稱嘆竟。

二頌約諸法顯示

義頌

如是大果報。種種性相義。我及十方佛。乃能知是事。是法不可示。言詞相寂滅。

頌凡六句。雙句讀之。逆對長行三科。義甚顯然。初二句。卽長行轉釋釋詞中義。長行約生起次第。故

以相性居初。此中承上文義便。故以果報爲首。蓋卽二智爲果。得此受用爲報也。又九如差別。生佛同具。首句約佛界舉末。故云大果大報。次句約生界舉本。故云種種性相。其實生界佛界中間本末俱該。然佛界云大。生界言種種者。以佛界殊勝。生界差別故。義指實相。生佛九如同歸。故後舉之。長行云本末究竟等是也。次二句。卽長行徵起釋成中義。我及十方佛。乃能知是事者。不惟知其差別。兼復知其同歸。長行云。惟佛與佛。乃能究盡諸法實相是也。末二句。卽長行取要絕言中義。是法卽

十如之法。雖惟佛究盡。亦祇冷暖自知。實不能言其所以。故曰不可示也。既不可示。則欲談詞喪。故曰言詞相寂滅。古德云。佛法太煞有。只是舌頭短。卽此義也。正頌長行竟。

二極顯難知

補頌

三

一許信得解。二揀思不及三。

明證始知

初

諸餘衆生類。無有能得解。除諸菩薩衆。信力堅固者。除佛一人。九界俱該。故云諸餘衆類。六凡全迷。三聖分覺。故云無能得解。菩薩信力堅固。將來未可限量。故獨除之。以究竟有能解時也。大經云。信爲

道元功德母。長養一切諸善法。智論云。佛法大海。信爲能入。本經後文亦云。汝舍利弗。尚於此經。以信得入。則信之爲力。大矣哉。故五力以之爲首。而此中所以獨除。有志佛智者。宜知勉夫。

二揀思不及三 一揀聲聞二揀辟支三揀菩薩
初

諸佛弟子衆。曾供養諸佛。一切漏已盡。住是最後身。如是諸人等。其力所不堪。○假使滿世間。皆如舍利弗。盡思共度量。不能測佛智。正使滿十方。皆如舍利弗。及餘諸弟子。亦滿十方刹。盡思共度量。亦復不能

知。

初揀諸佛弟子。總舉十方三世。一切聲聞。故云諸佛弟子。供佛必聞法。顯智德之深。漏盡則惱絕。顯斷德之極。住最後身者。惟餘果縛。顯是無學人也。其力不堪者。有三義。一樂小。二怖大。三用心。樂小則得少爲足。怖大則怯懼不求。用心乃意識分別。是皆不足以窮佛智。故不堪也。○假使下。揀釋迦弟子。假使者。設若義。舍利智稱第一。滿世如之。其智可謂廣矣。盡上聲。盡思。謂任其思索。度量。謂卜度較量。言佛智以無分別爲體。二乘以分別爲心。

心境相乖。故雖任其思索。共相卜度較量。亦所不測也。正使者。縱令義十方如舍利者。揀非一界。較上滿世尤多。餘諸弟子者。如神通目連。說法富那等。各如舍利之多。故云亦滿十方刹也。總之用心既錯。愈求愈遠。如人急欲東行。面向西走。故曰盡思共度量。亦復不能知。

二揀辟支

辟支佛利智。無漏最後身。亦滿十方界。其數如竹林。斯等共一心。於億無量劫。欲思佛實智。莫能知少分。辟支侵習。居聲聞上。故稱利智。三界生緣已盡。唯

餘身智未泯。故稱無漏後身。亦滿十方者。分齊與聲聞正等。數如竹林者。數目比聲聞更多。斯等一心者。協力與聲聞正等。億無量劫者。經時比聲聞更長。欲思實智者。用心與聲聞正等。莫知少分者。不知比聲聞愈甚。所謂只因分別細。反令覺照遲也。三揀菩薩

新發意菩薩。供養無數佛。了達諸義趣。又能善說法。如稻麻竹葦。充滿十方刹。一心以妙智。於恒河沙劫。咸皆共思量。不能知佛智。○不退諸菩薩。其數如恒沙。一心共思求。亦復不能知。

初揀初心。新發意者。或博地凡夫。最初發心。或不
定二乘。回小向大者。皆是也。供佛顯福德淳厚。了
義顯智慧深廣。說法顯悲智雙運。初心便能如此。
應非權漸初心可比。稻麻竹葦者。又非但如竹林
可比。滿而曰充。滿之極也。智而曰妙。智非小也。恒
河沙劫者。又非億無量劫可比。咸共思量。不能知
者。以既屬思量。卽是分別。有乖智體。豈能知乎。所
謂纔生擬議。白雲萬里者。以此。○不退下。揀深位。
八地以上。無功用道。任運流入薩婆若海。俱名不
退。數如恒沙。又非但如稻麻竹葦可比。一心共思。

亦復不知者。衆愈多而心愈細。心愈細而智愈遠。故此上三科。自聲聞以至不退。論果證則前前不及後後。論智慧則後後勝於前前。其數目愈多。其經時愈長。其用心愈極。其不知愈甚。總之佛智絕思。實相無相。不可以有心求。只可以無心得。罔象得珠。可爲喻矣。揀思不及竟。

三明證始知

又告舍利弗。無漏不思議。甚深微妙法。我今已具得。惟我知是相。十方佛亦然。

承上旣皆不知。畢竟有能知者。故又告之。佛之所

證故稱無漏。口欲談而詞喪。心將緣而慮亡。故又以不思議稱之。甚深微妙者。非二乘所知。及菩薩所及故。如來一一體證。故云我已具得。惟揀餘衆。我明一已。言其中權實義相。如來獨能明見。不共餘乘。故曰惟我知是。一切正覺。亦皆體證明見。故云十方亦然。外此者。不足以與此也。

問。準前長行偈頌。或言權

實二智。或言諸法實相。或權實雙稱。或實智單舉。或言無漏。不思議等。忽此忽彼。以致講者無可準的。蓋明示之。以開畫一之論乎。答。權實二智。惟約佛界而言。諸法實相。通兼生界而論。生佛同歸。其實皆一體也。又權實二智。屬心。諸法實相。屬境。心境同會。其實皆一理也。權實雙稱者。體用對論。實智單舉者。以體該用。其實皆一智也。至云無漏。不思議等。兼權實二智。諸法實相。而總言之。然佛既

隨意拈提。講者亦惟隨文銷釋。果能一處透過。處處圓通。前後實不相背。如蝸牛角。左右舒縮俱得。極顯難知竟。

三畧爲顯破。

準前長行偈頌。俱是卽權顯實。欲令二乘人等。就路還家。惟長行自證智

慧文中。微有廢破權宗之意。而語未顯然。且是隨廢隨立。終歸卽權顯實之義。其奈二乘人等。旣不解。卽權明實。又不知權說非真。故今畧爲顯破。庶金錢黃葉。魚目明珠。可立辯矣。屬補頌。

舍利弗當知。諸佛語無異。於佛所說法。當生大信力。世尊法久後。要當說真實。○告諸聲聞衆。及求緣覺乘。我令脫苦縛。逮得涅槃者。佛以方便力。示以三乘教。衆生處處着。引之令得出。

初畧顯真實。當知者。警策之詞。謂警以佛語無異。

策以佛說當信也。佛語無異者。證理既同。如所證說故。既如所證而說。自非浮信可及。故教以當生大信。世尊法久後者。既經方等日久。又歷般若曰後。要當說真實者。時已至故。機已熟故。○告諸下。畧破權宗。顯實獨告身子。破權徧告聞緣者。身子執輕易解。聞緣執重難開。故我令脫苦等。正佛告之語。苦縛卽界內見思。聲聞辟支同斷。故云令脫。涅槃卽界外權果。聲聞辟支同證。故云逮得。者字宜作人字。謂如來當時告諸聲聞及緣覺云。我從前令脫苦縛。逮得涅槃人等。甚勿以所得爲真也。

佛以二句。顯三乘之法。乃如來方便施設。非真實。
故。衆生二句。顯三乘之果。乃如來對破諸着。非究竟。
故。獨告聞緣。兼破三乘者。顯菩薩執輕。惟帶破。
故。畧明權實竟。

二動執生疑

動執者。主解之端。生疑者。發悟之機。故曰大疑大悟。小疑小悟。不疑不悟。

講者。往往於疑處不能分疏。至於悟處自不能照應。以致前後矛盾。反怪經文不齊。今於懸科之下。一一分疏明白。務令疑處與悟處相應。至於臨文。不費詞而自明矣。準後身子領解文云。我昔從佛。聞如是法。見諸菩薩。受記作佛。而我等不預斯事。甚自感傷。是知身子於阿耨菩提。惟恐不得久矣。今聞諸佛智慧。甚深無量。又聞如來知見。廣大深遠等語。愈以增其惟恐或失之心。故向下三請文云。何故殷勤稱嘆。甚深微妙難解之法。又云。願出微妙音。時爲如實說。又云。無上兩足尊。願說第一。

法等俱躡稱嘆實智之文。此身子之疑也。四子信解文云。我等自謂已得涅槃。無所堪任等。是知會衆於小乘涅槃。保證自足久矣。今聞其智慧門難解難入。又聞隨宜所說。意趣難解等語。不覺動其舊執。故向下作念文云。世尊何故殷勤稱嘆方便。乃至我等亦得此法。到於涅槃等。俱躡稱嘆權智之文。此會衆分二。一千二動執作念二身子騰之疑也。詳之。

疑三請 初二 一躡今教以作念二執昔教以

成疑 初

爾時大衆中有諸聲聞漏盡阿羅漢。阿若憍陳如等千二百人。及發聲聞辟支佛心比丘比丘尼。優婆塞優婆夷。○各作是念。今者世尊何故殷勤稱嘆方便而作是言。佛所得法甚深難解。有所言說意趣難知。

一切聲聞辟支佛所不能及。

初敘作念之衆。漏盡羅漢等。先敘無學。陳如先得道果。故首標之。千二百人者。佛成道一年。度陳如等五人。二年。度耶舍長者子五十人。三年。度迦葉兄弟。兼徒衆共一千人。五年。度身子目連。各兼徒一百。共有一千二百五十五人。得果感恩。常隨於佛。今云千二百者。舉大數耳。發聲聞辟支心等。次敘有學。或從出家發心。或從在家發心。故云比丘比丘尼等。○各作下。敘作念之詞。何故者。怪念之語。慇懃者。諄切之意。言世尊彈偏斥小。嘆大褒圓。

由來久矣。一旦稱嘆方便。已爲可異。而況其意慇懃。其詞諄切。故躡此以作念云。何故慇懃稱嘆方便。而作是言。云云。是言者。卽指上文稱嘆之語。其

語爲何。故向下復躡前語以備念之。佛所得法甚深難解者。躡前稱嘆實智之語。有所言說意趣難知者。躡前稱嘆權智之語。一切聲聞辟支所不能及者。躡前兼嘆權實之語。然雖總躡前語。而其意獨怪嘆權。以與昔教相違。動其舊執故也。躡今教以作念竟。二執昔教以成疑。

佛說一解脫義。我等亦得此法。到於涅槃。而今不知

是義所趣。

佛說指昔日三乘言三乘之法。始皆同斷見思。同出三界。同脫分段生死。故云一解脫義。亦得此法。到於涅槃者。自述聞法保證之義。而今不知。是義所趣者。是義獨指嘆權言。如來昔說權宗。我等亦到涅槃。而今又云意趣難知。聲聞辟支不及。或我等取證之非真乎。抑如來自語之相違乎。是義歸趣。我等卽不知矣。千二動執作念竟。

二身子騰疑三請三 一請爲上根二請爲中根
三請爲下根 初二 一長行二偈頌 初

爾時舍利弗。知四衆心疑。自亦未了。而白佛言。世尊。何因何緣。慇懃稱嘆。諸佛第一方便。甚深微妙難解之法。○我自昔來。未曾從佛聞如是說。今者四衆咸皆有疑。惟願世尊。敷演斯事。世尊何故。慇懃稱嘆。甚深微妙難解之法。

初躡舉疑端。四衆有疑在懷。寓中形外。故身子知之。身子疑雖有異。均屬未解佛語。故自亦未了。此經家敘置語也。自他俱疑。陳詞致問。故云而白佛言。何因何緣者。推問稱嘆所以。第一方便等。正述所稱嘆事。所稱嘆事。有因有果。第一方便。指諸佛

因所修法。前云。佛曾親近諸佛。盡行道法等是也。以是佛因。故稱第一方便。非指權智。甚深微妙。指諸佛果所證法。前云。成就甚深。未曾有法是也。然此實智因果。俱屬教菩薩法。今對聲聞稱嘆。已爲可異。而況其意慇懃。必有所爲。故以何因何緣而徵問之。○我自下。陳疑致請。昔指轉照三會。轉照三會。豈無大小同聞之時。但非正爲聲聞。而聲聞亦自以爲不預斯事。故曰未曾從聞。此應上文。自亦未了句也。四衆疑雖不同。而困心衡慮之態。同一彰著。故云咸皆有疑。此應上文。四衆心疑句也。

身子疑在嘆實。故別無所求。惟願敷演斯事。斯事
卽嘆實之事也。何故慇懃等。結請之語。言如上所
說甚深微妙難解之法。忽對聲聞稱嘆。或仍前彈
斥於我。究竟絕分乎。抑如來激發我等。令起勝心
乎。故以何故慇懃等而結請之。長行竟。

二偈頌

標頌
云

爾時舍利弗。欲重宣此義。而說偈言。

正頌
分二

一頌躡舉疑端。二頌陳疑致請。

初義頌
而廣

慧日大聖尊。久乃說是法。自說得如是。力無畏三昧。
禪定解脫等。不可思議法。道場所得法。無能發問者。

我意難可測。亦無能問者。無問而自說。稱嘆所行道。智慧甚微妙。諸佛之所得。

欲破疑暗。故稱佛爲慧日。願示果法。故稱佛爲大聖。究竟實智。從來不說。故云久乃說是法。自說得如是等。躡前嘆自證實智之文。自嘆自所證智。故云自說如是。力無畏等。約實智別相而言。前云如來知見廣大深遠。無量無礙。力無所畏等。是也不可思議法。約實智總體而言。前云深入無際。成就一切。未曾有法。是也。此相此體。是如來果所證法。故云道場所得。非佛自說。提唱絕人。故云無能發。

問我意二句。釋上無能發問之義。身子意謂我於聲聞智稱第一。於此實智體相猶難可測。况復餘衆誰復能起而問之哉。無問下。躡前嘆諸佛實智之文。出定便告。故云無問自說。稱嘆所行道者。如前云。佛曾親近諸佛。盡行道法。頌上長行第一方便句也。智慧微妙。佛之所得者。如前云。成就甚深。未曾有法。頌上長行甚深微妙難解之法句也。然此俱係素所不說。今無問自說。事屬可疑。故身子躡而舉之。頌躡舉疑端竟。

二頌陳疑致請

義頌而廣

無漏諸羅漢及求涅槃者。今皆墮疑網。佛何故說是其求緣覺者。比丘比丘尼。諸天龍鬼神及乾闥婆等。相視懷猶豫。瞻仰兩足尊。是事爲云何。願佛爲解說。○於諸聲聞衆。佛說我第一。我今自於智。疑惑不能了。爲是究竟法。爲是所行道。○佛口所生子。合掌瞻仰待。願出微妙音。時爲如實說。○諸天龍神等。其數如恒沙。求佛諸菩薩。大數有八萬。又諸萬億國。轉輪聖王至。合掌以敬心。欲聞具足道。

初代衆陳疑。無漏羅漢。是聲聞無學。求涅槃者。是聲聞有學。今敎與昔證相乖。故皆墮疑網。不知是

義所趣。故謂佛何故說求緣覺者。是辟支有學。比丘及尼。於有學中。獨舉出家衆也。諸天龍鬼等。是八部中五部等之一字。總攝無學及優婆塞夷并餘部也。相視猶豫等。是疑惑之相。是事云何等。是求決之情。皆身子代陳語也。○於諸下爲自陳疑身子意。謂佛於阿含會上。許我智慧無窮。是如來於聲聞衆中。說我第一。我今聞佛智慧。自於己智推度。竟爾疑惑不了。蓋卽爲是如來所嘆。諸佛究竟之法。又爲是如來所嘆。諸佛所行之道。不知此二。我亦能證能修否耶。據此。則身子之疑。全爲佛

因佛果。若會衆之自謂。亦得此法。到於涅槃者。豈可同日語哉。○佛口下。爲自致請。自以五分法身。從法化生。故云。口所生子。合掌瞻仰待者。自明傾渴翹佇。虛心俟教之意。願出微妙音者。不求隨他意語。以隨他意語。非微妙故。時爲如實說者。不求曲順權宗。以曲順權宗。不如實故。又以學佛心切。事不容緩。故求時爲說也。○諸天下。代衆致請。數如恒沙。舉八部上根之機。大數八萬。舉菩薩上根之機。轉輪聖王。舉人中上根之機。緣合時熟。乘輪而來。故云至也。合掌以敬心者。顯內外俱誠。欲聞

法華指掌疏
具足道者。顯願行俱大。既內外俱誠。願行俱大。其
爲上根無疑。想身子受記之後。供養慶讚等。卽此
衆也。據此。則陳疑雖兼衆會。致請獨爲上根。佛開
法說一周。正應此耳。請爲上根竟。

二請爲中根二 一如來爲人天絕言二身子爲
中根啟請 初

爾時佛告舍利弗。止止。不須復說。若說是事。一切世
間諸天及人。皆當驚疑。

止而又止者。以示必不可說之意。既示必不可說。
而又云不須復說者。以說之無益。不惟不可說。且

亦不用說故。若說下釋上不說之義。諸天及人。惟識有漏因果。不知出世正道。乍聞廢權立實之說。必當驚其驚於高遠。疑其涉於荒唐。說之無益。故所以不說也。

二身子爲中根啟請二 一長行二偈頌 初

舍利弗重白佛言。世尊。惟願說之。惟願說之。所以者何。是會無數百千萬億阿僧祇衆生。曾見諸佛。諸根猛利。智慧明了。聞佛所說。則能敬信。

重言惟願說之者。以明必當要說之意。所以句徵起。是會下釋成。法華高會。是如來不思議境。論地

則廣狹無礙。論時則十世異成。論衆則一多相容。論見則隱顯俱在。雖窮盡身子之智。無足較其衆數。故云無數百千等。曾見諸佛者。或智勝蓄因。或威音植種。言結緣之深故。諸根卽信進念定。由佛法熏習已久。觸境便起。方修卽成。故云猛利智慧。卽慧根。由惑障滌除。殆空遇事便知。對境卽徹。故云明了。如斯之人。自當聞而深敬。諦信無疑。縱有人天驚疑。亦可納種爲因。况佛法不爲愚者而默。日光不爲無目而隱。所以重言願說者。以此。

二偈頌

標頌云

爾時舍利弗欲重宣此義而說偈言。正頌云

法王無上尊。惟說願勿慮。是會無量衆。有能敬信者。
法王者。於法自在。若堅執不說。則不自在矣。無上
尊者。九界同尊。若有所簡棄。則非同尊矣。是稱謂
中有責望於佛。不可不說之意。惟說者。猶云只管
說也。願勿慮者。願勿以人天驚疑爲慮也。是會無
量衆。通指法會。有能敬信者。獨指中根。言法會有
如許無量之衆。除上根之外。豈盡驚疑之流。想應
有中等之資。能敬能信。如上所謂諸根猛利。智慧
明了人也。此是身子爲中根啟請。佛開譬喻一周。

正應乎此。請爲中根竟。

三請爲下根二。一如來爲上慢絕言二身子爲

下根啟請 初

佛復止舍利弗。若說是事。一切世間天人阿修羅皆

當驚疑。增上慢比丘將墜於大坑。○爾時世尊重說

偈言。

上標頌
下正頌

止止不須說。我法妙難思。諸增上慢者。

聞必不敬信。

初長行。復止者。請之益慙。止之益嚴。亦不屑之教也。天人修羅善道也。言若說是事。不惟惡道難信。雖善道衆生亦必河漢其言。故曰天人修羅皆當

驚疑大坑喻惡道。言增上而慢人。素以道德自矜。乍聞廢權立實之說。必至謗法招愆。墜墮三途。如大坑之不可復出。較之天人驚疑。不惟無益。而更有損焉。所以如來復止之也。○爾時下偈頌。旣云止。止不須說。又云我法妙難思。是分明欲說。特靳固以堅衆心耳。重舉上慢不信者。亦望其悔過自新之意。

二身子爲下根啟請二 一長行二偈頌 初

爾時舍利弗。重白佛言。世尊。惟願說之。惟願說之。今此會中。如我等比。百千萬億。世世已曾從佛受化。如

此人等必能敬信。長夜安隱。多所饒益。

重願者。止之愈嚴。請之愈切。見爲法之誠也。比猶類也。如我等比。百千萬億者。身子自指同類。有如許之多故。世世受化者。如大通結緣。中間度脫未盡。序中所謂智勝遺塵是也。長夜喻無明生死。安隱喻菩提涅槃。言既能敬信。必當斷無明。出生死。證菩提。至涅槃。是長夜得安隱矣。旣長夜安隱。則饒益不可勝言。故云多所饒益。多所者。多之不定。不能言其量也。二偈頌

標頌云

爾時舍利弗。欲重宣此義。而說偈言。

正頌云

無上兩足

尊。願說第一法。我爲佛長子。惟垂分別說。○是會無量衆。能敬信此法。佛已曾世世教化如是等。皆一心合掌。欲聽受佛語。我等千二百及餘求佛者。願爲此衆故。惟垂分別說。是等聞此法。則生大歡喜。

初先爲自請。爲是究竟法。故稱佛爲無上。爲是所行道。故稱佛爲兩足。是稱謂中有羨慕佛因佛果之意。第一法。指實智而言。後云我所得智慧微妙最第一是也。我爲佛長子者。是身子以能解自負。言佛若說法。人之信否無論。我必率衆領解。爲佛長子矣。惟垂分別說者。非求重說。但求如來。將前

所說之法。分析辯別。令得明顯耳。○是會下。正爲衆請身子意。謂我所以必求分別說者。非爲一己。蓋以是會有無量之衆。皆能敬信此法。何以見之。觀其根機。佛曾世世教化。察其動靜。一心合掌欲聞的指其人。卽我等千二百及餘求佛者是也。願爲二句結請。言是衆旣能敬信。卽應勿悵慈悲。故云願爲此衆故。惟垂分別說。末二句顯益。言是等因曲垂分別。得聞此法。了知自心作佛。自當生大歡喜也。觀此科。兩言惟垂分別。明知其爲下根啓請。佛開因緣一周。正應乎此。問三請之文。惟此中有惟垂分別之語。且

下二百人受記原在下根。科云請爲下根者。可矣。若前二請中。上中之機。未甚顯然。蓋明示之。以絕將來之疑乎。答。既信此爲下根。則上二便可類推。試觀此中機宜。但云。世世已曾從佛受化。至次請則云。諸根猛利。智慧明了。既較勝於此。其爲中根也。明矣。及初請則曰。求佛菩薩。大數八萬。準通序八萬菩薩。卽文殊觀音之流。此不謂之上根。可乎。據此。則上中下根。文甚顯然。將來何所疑乎。畧明權實以動執生疑竟。

二廣明權實以斷疑生信三 一法說一周被上

根二喻說一周被中根三因緣一周被下根 初

二一如來說法二上根獲益 初二 一長行

二偈頌 初四 一許說誠聽二讚法勸信三正

爲分解四斥過結勸 初三 一應求許說二因

法華指掌疏
退勸勉三當機願聞 初

爾時世尊告舍利弗。汝已慇懃三請。豈得不說。汝今諦聽。善思念之。吾當爲汝分別解說。

慇懃三請。情不能辭。故云豈得不說。諦審也。聽之不審。理非心得。故以諦聽誠之。思以智照。念以觀持。揀非識心分別。事相習誦。故云善也。大成云。諦聽聞慧。善思思慧。善念修慧。據此。則是教以從聞思修。入法華三昧之意。會衆同疑。身子獨慇。故云吾當爲汝開畧爲廣。斷疑生信。分別權實之宗。解釋三一之旨。故曰分別解說。

二因退勸勉

說此語時。會中有比丘比丘尼。優婆塞。優婆夷。五千人等。卽從座起。禮佛而退。所以者何。此輩罪根深重。及增上慢。未得謂得。未證謂證。有如此失。是以不住。○世尊默然。而不制止。○爾時佛告舍利弗。我今此衆。無復枝葉。純有貞實。舍利弗。如是增上慢人。退亦佳矣。汝今善聽。當爲汝說。

初五千退席。禮佛而退者。有二義。一實行。如下經家自釋。二權現。如前序主所明。所以句。徵起之詞。言會衆同疑。情均渴思。所以禮佛而退者。何也。故

向下約宿障現障以釋成之。罪根深重宿障也。由過去誹謗大乘。無量劫地獄罪畢。尚有餘習。能障大道。故名爲根。淵乎其不可拔。確乎其不可動。故曰深重。增上慢等。現障也。有增上心。無增上行。故云未得謂得。有增上名。無增上果。故曰未證謂證。是皆空腹高心。恐見廢斥。由此不堪聞大。故爲現障。既有過去餘德。復具現在慢過。故云有如此失。如此之人。不惟無緣聞法。亦且不欲聞法。故云是以不住。○世尊下。如來不禁默然者。聽其自便之意。制禁止留也。若以實行而論。此衆不去。有遮玄

化。若以權現而論。引進實行。在所當去。故佛不制止也。○爾時下抑揚勸勉。此衆指現前衆也。現前衆中。不雜上慢之流。故云無復枝葉。以枝葉喻上慢者。上慢徒慕虛名。不務真修。恐聞廢立之宗。難經考覈之會。如彼枝葉。雖扶疎可觀。經霜便凋。遇風便折也。旣無慢流。惟餘法器。故云純有貞實。以貞實喻法器者。法器外權內實。迹淺本深。堪受一乘之記。能取萬德之果。如彼貞實。雖質樸無文。發榮無限。滋生莫窮也。如此一抑一揚。器與非器。攸分。故重呼當機而誠勉之。佳善也。善其所退者有

二義。一爲聞而不解。易招謗法之愆。今不聞而去。善其無謗法之愆矣。二或正聞忽起。有惑聽衆之志。今將聞卽退。善其無惑衆之志矣。善聽者。虛心諦聽。當說者。傾心實說。言前此上。慢在座。彼旣不能虛心。佛亦未敢吐膽。今彼衆旣去。故誠以善聽。示以當說也。因退勸勉竟。

三當機願聞

舍利弗言。唯然世尊。願樂欲聞。

唯然者。應之速而無疑也。又野語曰阿。文語曰唯。皆應諾之詞。心之所期曰願。意之所望曰樂。願樂

欲聞者。如鳥待哺。如渴思水。古德云。聽者端視如渴飲。一心入於語義中是也。許說誠聽竟。

二讚法勸信

佛告舍利弗。如是妙法。諸佛如來時乃說之。如優曇鉢華。時一現耳。○舍利弗。汝等當信佛之所說。言不虛妄。

初讚法舉喻。如是妙法者。承前畧明。指後廣明。無非顯示佛智。故通稱妙法。不惟佛於四十年來。久默斯要。卽彼十方三世一切諸佛。亦皆不務速說。故云諸佛如來時乃說之。此總讚一經微妙希有。

義也。優曇鉢華。華中之最微妙者。非時不現。必待諸佛出世。及輪王應運。乃現。故云時一現耳。此總喻一經微妙。希有義也。法喻合明。令衆易了。亦卽大開全題。總提要義。爲下諸文作案。餘義詳見第九門中。○舍利下勸信佛言。雖曰微妙。惟信力可入。故勸以汝等當信。雖曰希有。而說必真實。故示以言無虛妄。旣言無虛妄。則聞熏皆成智種。解入便是佛乘。其不力信者。亦猶到寶所而空回。守飯籬而呼饑。惟自棄悞。夫誰怨歟。讚法勸信竟。

三正爲分解三 一畧爲分解二詳爲分解三舉

濁防難 初三 一畧解諸佛權實二畧解自證

權實三總結以顯道同 初

舍利弗。諸佛隨宜說法。意趣難解。○所以者何。我以無數方便。種種因緣。譬喻言詞。演說諸法。是法非思量分別之所能解。

初躡疑標舉。隨宜二句。是會衆之疑端。今欲分解。

故躡彼而標舉之。

問。法說獨被上根。何不躡身子之疑乎。答。欲會權宗。以歸真實。

故躡權疑標舉。至若身子之疑。迨會權歸實之後。不欲釋而自釋矣。

○所以下徵起

釋成。徵起可知。我以無數等。引自所有。以釋諸佛權實義也。方便因緣。譬喻言詞。演說諸法。是如來

自所有權。識權權滅。全體真實。故非思量分別之所能解。自權既爾。諸佛亦然。所謂諸佛隨宜說法。意趣難解者。以此。

二畧解自證權實二 一標舉徵釋二轉釋釋詞
初

惟有諸佛。乃能知之。○所以者何。諸佛世尊。惟以一大事因緣故。出現於世。

初承上標舉。言我說諸法。既非思量分別能解。契斯旨者。夫其誰歟。故標以惟有諸佛。乃能知之。○所以下。徵起釋成。徵起可知。諸佛世尊等。引諸佛

所有。以釋自證權實義也。惟猶獨也。以猶爲也。言諸佛所爲。無二無三。故曰惟以一事。此事非小。故曰惟以一大事。因此生悲。緣此感佛。故曰惟以一大事。因緣。因緣湊合。佛乃出興。故曰惟以一大事。因緣故。出現於世。此是諸佛共所有實。旣爲此出世。凡有所說。皆宗乎此。諸佛旣爾。如來亦然。所謂我說諸法。惟有諸佛乃能知之者。以此。

二轉釋釋詞

以是諸佛本懷。羣生達道。全經要旨。故轉釋之。

舍利弗。云何名諸佛世尊。惟以一大事。因緣故。出現於世。○諸佛世尊。欲令衆生開佛知見。使得清淨故。

出現於世。欲示衆生佛之知見故。出現於世。欲令衆生悟佛知見故。出現於世。欲令衆生入佛知見道故。出現於世。○舍利弗。是爲諸佛以一大事因緣故。出現於世。

初躡前徵起。謂躡前釋詞。以轉徵其義也。○諸佛下承徵別釋。四欲字。是諸佛本懷。謂諸佛本懷。欲以四事共成一大事也。四事者何。第一開佛知見。古德以開字從佛。今據現文。應令衆生自開。非佛開也。若釋其義者。開謂開自封閉。顯自家珍。佛知見者。卽衆生六根門頭。本具不生滅性。在眼曰見。

在耳曰聞。乃至在意曰知。今僅云知見者。以元一精明。舉初後以攝中故。然此知見。衆生與佛無異。故云佛知佛見。但衆生爲根塵封閉。迷昧本有家珍。持珠作丐。枉受輪迴。如來出世。欲令衆生於見色聞聲等處。回光反照。外遺內脫。無始封閉全開。本有家珍頓顯。能至乎此。名爲開佛知見。猶是見道初步。宗家所謂破參是也。使得清淨者。億劫倒想。從此頓銷。故第二示佛知見。示者。將己所有。昭示於人也。佛之知見。與上不同。上約在纏之體。生與佛同。名佛知見。此約出纏之相。佛與生異。名佛

之知見。言上來知見雖開。勝解未圓。惟知局六根之性。不達徧萬法之體。未免觸途成滯。遇事便乖。如來出世。欲以已所獨得佛之知見。昭示衆生。令衆生念念觀照。時時體察。務令知齊佛知。見齊佛見。亦皆蓋天蓋地。能令至此。名爲示佛知見。方是見道究竟。宗家所謂透關是也。第三悟佛知見。悟之一字。古德多約解悟義釋。今對上二。是悔悟。非解悟也。悔悟者。翻然悔悟。智解俱忘。智解俱忘。知見不立。前無新證。歸失故居。還同在纏。故仍名佛知佛見。言上來雖蒙示佛知見。見處同佛。但恐知

見立知。成無明本。反障正修。終成狂慧。如來出世。欲令衆生。悔悟從前所立知見。還同在纏一般。重起幻修。以期幻證。明知無佛可求。任運求佛。明知無生可度。任運度生。能令至此。名爲悟佛知見。猶是修道初步。宗家所謂懸崖撒手。杆頭進步是也。第四入佛知見。入者漸次深入。窮盡因門。窮盡因門。去佛不遠。名佛知見道。道猶路也。言上來雖已悟佛知見。從頭幻修幻證。但恐稍涉回途。便成退轉。虧一簣而未爲完山。及九仞而莫稱全井。如來出世。欲令衆生。於此起大勇猛。生大精進。漸次深

入。必至窮盡因門。能令至此。名爲入佛知見。方是修道究竟。按位卽齊分證諸聖。一念相應。便契佛乘矣。然此一段。因係諸佛本懷。本經宗旨。又爲修證關鍵。凡古註家。莫不極力發揮。今惟據文釋義。不能附會諸說。倘有脗合。幸高明者臨講變通。○舍利下結歸徵詞。是爲二字。應上云何二字。猶一問一答之類。畧解自證權實竟。

三總結以顯道同

佛告舍利弗。諸佛如來。但教化菩薩。諸有所作。常爲一事。惟以佛之知見。示悟衆生。○舍利弗。如來但以

一佛乘故。爲衆生說法。無有餘乘。若二若三。

初結諸佛權實。但教菩薩句。約機以結。諸有所作。下。約教以釋。諸有所作。權也。常爲一事實也。權旣爲實。則所教但是菩薩明矣。示悟二字。與前不同。前約次第各論。此則淺深總該。謂指示開悟於衆生也。○舍利下。結自證權實爲實。然後施權。故云。但以一乘爲衆說法。會權無不卽實。故云。無有餘乘。若二若三。據此。則如來出世。與諸佛出世。無二道矣。畧爲分解竟。

二詳爲分解三 一詳解諸佛權實二詳解自證

法華指掌疏
權實三總結以顯道同

初三 一例上總標二

分文別列三總結本懷

初

舍利弗。一切十方諸佛。法亦如是。

一切總該三世。言三世各有十方。十方各有諸佛。故云一切十方諸佛。法卽權實之法。言上來雖已畧解諸佛權實。未曾顯彰諸佛分齊。今明十方三世諸佛。與上自他權實無異。故云法亦如是。此例上以標同也。

二分文別列三 一過去佛同二未來佛同三現

在佛同

初

舍利弗。過去諸佛。以無量無數方便。種種因緣。譬喻言詞。而爲衆生演說諸法。是法皆爲一佛乘故。是諸衆生。從諸佛聞法。究竟皆得一切種智。

過去諸佛。依本經則日月燈明。大通威音。雷音王。雲自在等。亦可指莊嚴劫千佛說也。以無下。從實施權。是法句。會權歸實。此約教言也。是諸二句。轉一爲三。究竟句。會三歸一。此約機言也。

二未來佛同

舍利弗。未來諸佛。當出於世。亦以無量無數方便。種種因緣。譬喻言詞。而爲衆生演說諸法。是法皆爲一

佛乘故。是諸衆生。從佛聞法。究竟皆得一切種智。

未來諸佛。依本經則華光名相。閻浮金光。旃檀香

山海慧等。亦可指星宿。劫千佛說也。餘同上。

問佛尚未

來。機教權實。何以預知之耶。答。先聖後聖。其揆一也。如繼周百世。宣父亦曰可知。况如來三達洞照。五眼圓明。雖至盡未來際。不待屈指而後辨也。

三現在佛同

舍利弗。現在十方無量百千萬億佛土中。諸佛世尊。多所饒益。安樂衆生。○是諸佛亦以無量無數方便。種種因緣。譬喻言詞。而爲衆生演說諸法。是法皆爲一佛乘故。是諸衆生。從佛聞法。究竟皆得一切種智。

初總明現在諸佛。依本經則一光所現。三變所集。妙音品之淨華宿王。普賢品之威德上王等。亦可指賢。刳千佛說也。饒益安樂者。初以權法饒益。令獲三乘安樂。後以實法饒益。令獲一乘安樂。如是饒益安樂。詳分則有種種差別。故云多所。○是諸下。別明同上。分文別列竟。

三總結本懷

舍利弗。是諸佛。但教化菩薩。欲以佛之知見。示衆生故。欲以佛之知見。悟衆生故。欲令衆生。入佛之知見故。

但化菩薩句。約機以結。欲以下約教以釋。示悟二字。與上不同。示謂指示本有。令信與佛無異。悟謂開悟蒙昧。令解與佛無異。既解之後。復欲令其從性起修。漸次深入。以至同佛。故云入佛之知見也。詳解諸佛權實竟。

二詳解自證權實

舍利弗。我今亦復如是。○知諸衆生有種種欲。深心所着。隨其本性。以種種因緣譬喻言詞。方便力而爲說法。舍利弗。如此皆爲得一佛乘。一切種智故。

初總以例明。○知諸下。別以詳解。種種欲者。或欲

求聲聞。或欲求緣覺。或欲求菩薩等。差別不同。故然。既各有所欲。必至酷好不捨。故云。深心所着。隨其下。卽從實施權。如云。爲求聲聞者。說應四諦法。爲求辟支佛者。說應因緣法。爲求菩薩者。說應六波羅密是也。舍利下。會權歸實。如云。令得阿耨多羅三藐三菩提。成一切種智是也。詳解自證權實竟。

三總結以顯道同

舍利弗。十方世界中。尚無二乘。何況有三。十方世界者。此界他方。合而論之。以是總結自他。

故也。惟爲一乘。菩薩猶不可得。故曰尚無二乘。菩薩既不可得。聲聞辟支。不言可知。故曰何況有三。

據此則自他出世。益信其無二道矣。詳爲分解竟。

三舉濁防難

恐承上難云。既無二無三。諸佛出世。何不直說一乘。而必先說三乘。乃故

爲是曲屈教耶。故此防云。諸佛出於五濁惡世等。蓋說二說三。亦諸佛不得已耳。

舍利弗。諸佛出於五濁惡世。所謂劫濁。煩惱濁。衆生濁。見濁。命濁。如是。○舍利弗。劫濁亂時。衆生垢重。慳貪嫉妬。成就諸不善根故。諸佛以方便力。於一佛乘。分別說三。

初佛出濁世。世本清平。因劫見惱。命衆積聚攪擾。

如清水中投以沙土。二性俱亡。容貌汨然。名之爲濁。當斯世也。人多弊惡。故以惡世稱之。諸佛愍此現身應化。故云出於此世。此總標也。所謂者。指下釋上之詞。刳濁無別體。卽以下四爲體。積聚交湊。熾然不停爲相。惱濁以五鈍使爲體。煩亂自性。逼惱身心爲相。衆濁以三緣和合爲體。六道輪迴。牽連不斷爲相。見濁以五利使爲體。執斷執常。邪知謬解爲相。命濁以識煖息三爲體。連持色心。催年減壽爲相。此別明也。如是者。總結之詞。謂五濁體相。如是而已。○舍利下。順時說三。舉刳濁。卽具四

濁。以四爲刳體故。準悲華經。人壽八萬歲。減至三萬歲。未名爲濁。至二萬歲時。卽名爲濁。雖名爲濁。較之佛出世時。猶爲清平之世。準今佛出世。當人壽百歲。較之人壽二萬歲時。未免世道澆漓。人心不古。愈趨愈下。愈流愈深。故云刳濁亂時。言諸佛出世。乃刳濁中之最亂時也。衆生垢重者。謂起惑造業。遮障正智。曰垢。剛強暴虐。難調難伏。曰重。慳貪嫉妬等。正釋垢重義也。慳謂吝已於他。貪謂取他益已。皆貪垢也。嫉謂憎賢厭能。如謂嫌才忌德。皆瞋垢。亦癡垢也。三垢已起。諸不善法。從此而生。

故名爲根。根旣成就。必至難調難伏。則其爲垢也。不綦重乎。方便有提拔之功。故稱爲力。於一說三者。以垢重障智。欲漸除以漸顯耳。據此則諸佛施權。豈得已哉。正爲分解竟。

四斥過結勸三。一設言婉斥。二覲面直斥。三結

勸信受。

初

如來明知其過。不遽然指斥。特假之設言。委婉其詞。令彼聞而自覺。此大

聖溫厚和平之德也。

舍利弗。若我弟子。自謂阿羅漢。辟支佛者。不聞不知。諸佛如來。但教化菩薩事。○此非佛弟子。非阿羅漢。非辟支佛。

初設言婉指。若我弟子者。謂設若我弟子中。有是人也。自謂羅漢辟支。卽得少爲足之輩。旣得少爲足。於佛教菩薩事。漫不經耳。亦漫不經意。故曰不聞不知。此如來明知其人。委婉其詞以指之。○此非下。斥過令覺。言旣爲佛子。應盡知佛事。今旣不知。是賴教乞食之輩。故云非佛弟子。旣證小果。應進聞大法。今旣不聞。是未證謂證之流。故云非阿羅漢。非辟支佛。此中三非字。有深惡痛絕之意。類此者極宜深醒。

二覲面直斥

上科以異與之言。悅而不釋。此科用法語之言。覲面而直斥之。此大聖好

善惡惡之公也。分三 一直斥其過二徵起釋成三轉顯

其過 初

又舍利弗。是諸比丘比丘尼。自謂已得阿羅漢。是最後身。究竟涅槃。便不復志求阿耨多羅三藐三菩提。○當知此輩皆是增上慢人。

初覲面直指。是諸比丘等。直接就出家衆中。指其人也。自謂已得等。是執權爲實之流。旣執權爲實。於阿耨菩提。不惟不求。亦復無志。故云不復志求。此如來洞悉其心。面對其人。以指之。○當知下。斥過令知。言旣臻權果。應求實證。今旣不復志求。是權

果未必究竟。故曰當知此輩是增上慢人。噫。本非上慢。坐以上慢之名。不復進求者。於此宜痛心焉。

二徵起釋成

所以者何。○若有比丘實得阿羅漢。若不信此法。無有是處。

首句徵起。○若有下。釋成。實得羅漢者。斷無不信此法。以是而知不復志求者。定非真實羅漢。所以謂之增上慢人也。

三轉顯其過

除佛滅度後。現前無佛。○所以者何。佛滅度後。如是

等經受持讀誦解義者是人難得。○若遇餘佛於此法中便得決了。

初承上開除佛滅度後現前無佛。羅漢不信是法者。容或有之。故開除也。○所以下徵起釋成言佛滅度後。此等之經求其背本受持對本讀誦及曉解其義者。百無一二。故云是人難得。由是人難得。無所師承。故雖真實羅漢。莫保其無不信之流。所以除之者。以此。○若遇下設言轉顯言果是真實羅漢。雖暫時不信。不遇餘佛則已。設若乘通遠至。或緣熟轉生。一遇餘佛。便得決斷權疑了達實義。

由此而觀。轉顯不復志求者。定屬上慢無疑。覲面直斥竟。

三結勸信受

兩番斥過。雖頑石亦應點頭。故此科結勸信受。以終其義也。

舍利弗。汝等當一心信解。受持佛語。諸佛如來言無虛妄。無有餘乘。惟一佛乘。

汝等者。別指身子一類無過者而言。言從前所斥之衆。固不必論矣。汝等既非彼比。故當一心信解。受持佛語。所以然者。以諸佛如來言無虛妄。既言無虛妄。自不以若二若三。欺誑衆生。故云無有餘乘。惟一佛乘。既無餘惟一。幸勿以已得爲足。還當

以未證爲期也。長行竟。

二偈頌

標頌云

爾時世尊欲重宣此義而說偈言。

正頌分四

一頌許說誠聽。二頌正爲分解。三頌讚法勸信。四

頌斥過結勸。

初

約義畧頌

比丘比丘尼有懷增上慢。優婆塞我慢。優婆夷不信。如是四衆等。其數有五千。不自見其過於戒有缺漏。護惜其瑕疵。是小智已出。○衆中之糟糠。佛威德故去。斯人勘福德。不堪受是法。○此衆無枝葉。惟有諸貞實。舍利弗善聽。

初五千退席。

長行經家敘置偈頌如來自述非重頌類故直註節旨而不言頌也下節

做此出家衆詐現威儀假粧禪相者多故偏懷上慢。

優婆塞挾財仗勢着相邀名者多故偏號我慢。優婆夷兒女情重罪福念輕者多故偏名不信。準長行四衆皆名上慢。今各據多分言之。上慢專於外飾不知內省。我慢惟知驕人。罔解修己不信昧於罪福迷於功咎。故有過不自見也。由不自見故曰積月累以致戒有缺漏。缺漏者戒如城池犯則成缺。戒如浮囊損則有漏。故護遮護謂恐彰己短惜憚惜謂畏改之難。玉之內玷曰瑕。外玷曰玼。戒有

缺漏如之。然既戒有缺漏。如玉有瑕疵。理當發露。改革。期爲全人。乃竟善於遮護。一味憚惜。是爲甘於下流。不思上進之輩。故以小智稱之。由此不堪聞大。故綸音欲降。已先出也。○衆中下世尊不禁。長行經家敘其不禁。偈頌如來明其不禁。意義互顯。上慢徒慕虛名。不務眞修實證。如彼去酒之渣。去米之皮。故曰衆中糟糠。如來智鑑無私。洞察彼之肺腑。彼雖欲掩其過。有所不能。故曰威德故去。既以威德故去。如來何不禁制。令作繫珠緣乎。皆以斯人戒有缺漏。智慧狹小。尠福尠德。不堪受是大法。亦如潢流不注瓦缶。

福澤不降淫人。故世尊默然不制止也。○此衆下抑揚勸勉。可知。準長行。前有應求許說。後有當機願聞。俱畧也。頌許說誠聽竟。

二頌正爲分解

頌超

三

一頌畧爲分解二頌舉濁

防難三頌詳爲分解

初三

一合頌自他之權

二合頌自他之實三義頌結顯道同

初二一

頌諸佛之權二頌自證之權

初

諸佛所得法。無量方便力。而爲衆生說。

諸佛所得實智也。無量方便權智也。權智隨機。故云爲衆生說。長行所謂隨宜說法是也。

二頌自證之權二 一通為群機二別為二乘

初

衆生心所念種種所行道若干諸欲性先世善惡業

○佛悉知是已。以諸緣譬喻言詞方便力。令一切歡

喜。○或說修多羅契經伽陀孤起及本事。本生未曾有。亦

說於因緣譬喻并祇夜重頌優波提舍論議經。

初衆生機性。念之一字。義通能所。衆生心為能念。

所行道為所念。若釋其義者。念謂拳拳服膺。朝夕

不忘。道謂三乘所修。正助道法。正助道法。其類不

一。故云種種。此約三乘機性言之。欲謂心心向往。

時刻不輟。時刻不輟。習成人天機性。故云欲性。欲性不一。故云若干。不惟欲性若干。卽先世所作之業。亦有善惡不同。此約人天機性言之。○佛悉下如來教益。悉知是已者。觀機有準。諸緣譬喻等。施教無差。施教無差。隨分成益。故令一切歡喜。後文所謂適其願。故心各勇銳是也。○或說下。法部差別。名義見於懸義。

二別爲二乘

佛慈雖普。別爲二乘。意多。以是昔緣中復退大。較之菩薩。情屬可愍。較之

凡夫。理在可接故。

鈍根樂小法。貪着於生死。於諸無量佛。不行深妙道。

衆苦所惱亂爲是說涅槃。

此中二乘機性有二。若原從二乘中來。則鈍根樂小法。若原從凡夫中來。則貪着於生死。樂小法者。雖值無量諸佛。不行菩薩深妙之道。道稱深妙者。無住之因。非二乘所及。故貪着生死者。纏綿三界之中。常爲衆苦之所惱亂。苦稱惱亂者。逼惱其身。動亂其心。故爲是說涅槃者。由不行深妙道故。暫濟化壘。由衆苦所惱亂故。急救然眉。出世本懷。不如是也。合頌自他之權竟。

二合頌自他之實二 一頌自證之實二 頌諸佛

之實 初二 一會權歸實二三根獲益 初

我設是方便。令得入佛慧。未曾說汝等當得成佛道。所以未曾說。說時未至故。今正是其時。決定說大乘。○我此九部法。隨順衆生說。入大乘爲本。以故說是經。

初別會二乘。設是方便。令入佛慧者。明施權本意。未曾說汝當得成佛者。明以權覆實。所以未說。說時未至者。明覆實所以。今正是時。決定說大者。明及時開顯。言目今根機已熟。會不可失。故曰正是其時。開顯會歸。但教菩薩。故云決定說大也。○我

此下通會諸教。言不惟小乘涅槃。是方便說。卽我從前所說九部之法。皆爲隨順衆生。必至會入大乘。乃佛本意。以是之故。今說是經。普會從前所說。同歸乎大也。

二三根獲益二 一正爲上根。二兼爲中下。初有佛子。心淨柔軟。亦利根。無量諸佛所。而行深妙道。○爲此諸佛子。說是大乘經。我記如是人。來世成佛道。○以深心念佛。修持淨戒。故此等聞得佛。大喜充徧身。佛知彼心行。故爲說大乘。

初根利因深。根利因深。堪於受記成佛。故稱佛子。

心淨者。專心求佛。不雜餘念。柔軟者。不執權宗。隨
順實教。利根者。諸根猛利。智慧明了。此約現在根
利言之。無量佛所。顯值佛之廣。行深妙道。顯修因
之大。此約過去因深言之。○爲此下說法授記。由
彼根利因深。堪受大法。故爲說大乘經。旣聞法已。
了知自心作佛。故記來世成道。○以深下獲益歡
喜。深心念佛者。念念求成。惟恐不得。正受道之機。
修持淨戒者。嚴護篇聚。無缺無漏。正載道之器。以
斯機器。忽聞得記成佛。如苗遇雨。故云大喜充徧
身也。心卽深心念佛之心。行卽修持淨戒之行。佛

以知此故爲說大。所謂不失人。亦不失言矣。

二兼爲中下

聲聞若菩薩聞我所說法。乃至於一偈皆成佛無疑。聲聞指實行聲聞下根也。菩薩指權漸菩薩中根也。若猶及也。言說法雖爲上根。而下根聲聞及中根菩薩聞我所說。雖少至一偈。亦皆成佛無疑。況於多乎。是則聞此法者。幸勿自疑自悞可也。頌自證之實竟。

二頌諸佛之實

十方佛土中。惟有一乘法。無二亦無三。除佛方便說。

法華指掌疏
但以假名字。引導於衆生。說佛智慧故。

諸佛世尊。唯以一大事因緣故。出現於世。故曰。惟有一乘。無二無三。旣無二三。凡說二說三者。俱係方便。故云除也。然諸佛所以方便說二三者。但爲衆生處處貪着。暫借假名而引導之。原佛本意。究竟爲說佛慧故也。合頌自他之實竟。

三義頌結顯道同二 一正頌長行二防問斷疑
初

諸佛出於世。惟此一事實。餘二則非真。終不以小乘。濟度於衆生。○佛自住大乘。如其所得法。定慧力莊

嚴以此度衆生。自證無上道。大乘平等法。若以小乘化。乃至於一人。我則墮慳貪。此事爲不可。

初頌結諸佛權實。諸佛如來。但教菩薩。故曰惟此一事。實餘二則非真。唯以佛之知見。示悟衆生。故曰終不以小乘。濟度於衆生。此與長行文別而義同也。○佛自下。頌結自證權實。智冥實理。全智住於理中。不共凡小。故云自住大乘。如其所得等。如猶稱也。謂稱已所得大乘之法。以定慧力。莊嚴聖教也。莊嚴聖教。必以定慧力者。以非定不能契。非慧無由說。故以此度生句。出莊嚴聖教之意。自證

無上等。明以此度生之由。大乘之上。置以無上道言者。具二揀別。一揀證。二揀教。揀證者。佛及菩薩所證。皆稱大乘。無上道言。卽揀菩薩。惟佛得證故。揀教者。始終頓圓四教。皆名大乘。無上道言。卽揀前三。唯圓可稱故。平等者。生佛共秉。雖生佛共秉。凡小迷而不知。菩薩知而未極。故曰自證無上道。大乘平等法也。旣自證無上。不可以有上教人。若以小化。是教人以有上法矣。旣大乘平等。亦當令衆生同得。乃至一人。是不令其同得大矣。如是乃有私於己。不公於物。故云則墮慳貪。慳貪二字。豈

慈父所宜有。故曰此爲不可。由此所以莊嚴聖教以度生也。正頌長行竟。

二防問斷疑

此屬補頌

分二

一防承上致問二斷序

分餘疑

初

問世尊說權說實臨蒞十方得大無畏何所據耶故此防云。

若人信歸佛。如來不欺誑。亦無貪嫉意。斷諸法中惡。故佛於十方而獨無所畏。

信謂心相宥信。歸謂身相歸投。旣心相宥信。身相歸投。佛卽視彼如子。處已若父。故不欺誑。亦無貪嫉。不欺誑者。言初說三乘。皆以時未至故。機未熟故。並非欺彼無智。誑以權宗。無貪嫉者。言今說一

乘亦以時已至故。機已熟故。豈復貪恪大乘。嫉人同得。若畧有欺誑。稍涉貪嫉。雖非世諦煩惱。亦屬法中惡見。如來既不既無。故云斷也。由斷此故。所以臨蒞十方。說法度生。獨無所畏。言獨無所畏者。顯欺誑未斷者。則恐露已短。貪嫉未斷者。則恐顯他長。臨衆說法。未免畏首畏尾。不能如是也。

二斷序分餘疑。因序分文殊結答偈云。諸求三乘人。若有疑悔者。佛當爲除斷。令盡無有餘。據此則三乘餘疑。尚待如來爲斷。今如來自出定後。已經畧明廣明。自他權實之旨。至此三乘餘疑。料已殆盡。故自舉放光所爲以斷之云。

我以相嚴身。光明照世間。無量衆所尊。爲說實相印。

佛身以相好爲嚴。故云相嚴身。光明卽相嚴身中。所放白毫相光。世間卽白毫相光。所照萬八千土。無量衆所尊。卽萬八千土。所現萬八千佛。末句乃結斷之詞。言我以相嚴身中。放白毫光明。照萬八千土。及現萬八千佛者。無別所爲。乃爲說實相印耳。實相稱印者。以佛佛相授。代代相承。如傳國之璽。故名爲印。又以一切諸法。皆依實相而出。如印印像。故名爲印。法句經云。森羅及萬像。一法之所印是也。頌畧爲分解竟。

二頌舉濁防難

超頌

二

一

自慶願滿

二

義頌

長文

初超頌中
補頌

舍利弗當知。我本立誓願。欲令一切衆。如我等無異。如我昔所願。今者已滿足。化一切衆生。皆令入佛道。餘疑既斷。信解斯生。欲示慶幸之意。故教以當知。本立誓願。或指寶藏佛時。愚謂不必拘泥。卽大通威音時。豈無願乎。欲令一切。如我無異者。卽衆生無邊誓願普度之意。如我所願。今已滿足者。約一期事畢而論。謂所應度者。皆已度訖。未得度者。已作得度緣故。化一切衆。令入佛道者。約究竟圓滿而論。謂解行在躬。見聞爲種。淺深雖異。究竟成佛。

故前云聲聞若菩薩聞我所說法乃至於一偈皆成佛無疑是也。

二義頌長文

屬超頌中義頌

分二

一頌佛出濁世二頌

順時說三

初

防難之義與長行不同長行承總結道同義來此中承自慶願滿義

來難云既欲令一切與佛無異理當凡遇衆生盡以佛道教之初說三乘何所爲耶故此防云

若我遇衆生盡教以佛道無智者錯亂迷惑不受教。○我知此衆生未曾修善本堅着於五欲癡愛故生惱。○以諸欲因緣墜墮三惡道輪迴六趣中備受諸苦毒。○受胎之微形。世世常增長。○薄德少福人衆苦所逼迫入邪見稠林。若有若無等依止此諸見具

足六十二。深着虛妄法。堅受不可捨。我慢自矜高。諂曲心不實。於千萬億劫。不聞佛名字。亦不聞正法。如是人難度。

初頌劫濁。長行承結顯道同義來。故曰諸佛出於五濁惡世。此中承自慶願滿義來。故云若我遇衆生。盡教以佛道。衆生卽劫濁衆生。以如來出世。當劫濁最亂時也。亂時衆生。盡以佛道教之。則左矣。何故。言彼時衆生。垢輕而有智者少。垢重而無智者多。無智之人。一向錯亂修習。邪正不分。乍聞佛道。將必迷而不知。惑而不信。自然不受教矣。○我

知下。頌煩惱濁。多劫廣積惡因。故曰未修善本。現在隨逐塵境。故曰堅着五欲。堅着卽貪惑也。由貪惑故。執迷不了。而癡愛繼之。癡愛卽癡惑也。由癡惑故。是非競起。而瞋惱生焉。生惱卽瞋惑也。依此三惑而爲根本。百八煩惱從此而生。非煩惱濁乎。○以諸下。頌衆生濁。以前諸欲而爲因緣。起貪瞋癡。地獄鬼畜之報。不旋踵而卽至。故曰墜三惡道。縱惡道罪畢。轉生人天。失手錯脚。復從淪溺。故曰輪迴六趣。所謂處處受生是也。旣處處受生。自然衆苦備受。非衆生濁乎。○受胎下。頌命濁。微形者。

大成云。非胎中微小之形。乃中陰隱微之形。所見最是。以中陰若有若無。凡眼不見。故稱微形。復置受胎言者。以其體卽是八識。投胎領命。全依乎此。規矩云。去後來先作主公是也。世世常增長者。由此識心。合煖息爲命根。生生世世。增長色身。非命濁乎。○薄德下。頗見濁言。旣增長色身。難免品類不齊。其間薄德少福者。旣乏出世之德。又慙世間之福。故爲衆苦逼迫。由逼迫故。希望出離。其奈不遇明師。以致誤入邪見。邪見衆多。故曰稠林。若有若無等。正明邪見衆多義也。有卽常見。無卽斷見。

此二同爲邊見。等該身邪見戒。依此諸見以爲根本。展轉妄計。具足六十二種。如計卽色是我。^一離色是我。^二色大我小。我在色中。^三我大色小。色在我中。^四色陰旣爾。四陰亦然。共爲二十。三世成六。合根本斷常。則成六十二見。所謂稠林者。此也。深着妄法者。非果計果。終無實證。卽攝見取。堅受不捨者。邪見覆心。雖佛莫易。亦攝邪見。我慢者。執身有我。凌傲他人。卽攝身見。自矜者。非因計因。邪戒自憍。亦攝戒見。此以上文等言含糊。重申四見相也。諂曲者。爲求利養。諂媚豪勢。曲奉尊富。雖諂媚

曲奉。乃詐於恭敬。故誅以其心不實。此語可媿寶鏡。畢照邪態。吾知外道聞之。必心膽俱裂矣。照妖集云。着邪見者。心竅俱迷。生同醉夢。死從輪溺。故曰千萬億劫。不聞佛名。又曰盡未來際。諸佛亦無策以相救。故曰亦不聞法。是人難度。又曰邪教害人。甚於虎狼。故世尊獨廣明之。頌佛出濁世竟。

二頌順時說三

是故舍利弗。我爲設方便。說諸盡苦道。示之以涅槃。我雖說涅槃。是亦非真滅。諸法從本來。常自寂滅相。佛子行道已。來世得作佛。

是故者。承上起下之辭。如來意謂。以是五濁展轉。甚至流於邪見之故。舍利弗。當知如來施權。非得已也。由彼千萬億劫。不得見佛聞法。欲令漸次熏習。故曰爲設方便。由彼衆苦逼迫。流入邪見。故說盡苦之道。絕其源也。由彼深着妄法。堅受不捨。故示涅槃之道。易其情也。然此涅槃。但滅見思煩惱。分段生死。尚餘塵沙無明。變易生死。故云雖說涅槃。亦非真滅。諸法卽情與無情。染淨差別等法。從本來常自寂滅者。以一心原有二門。一真如門。不變義。二生滅門。隨緣義。然真如卽是生滅。故能隨

緣變現諸法。生滅卽是真如。故從本來常自寂滅。
了此本寂。乃真涅槃。若如前所說。不過離亂求寂。
對生言滅。豈真滅哉。佛子。卽了此本寂之人。了此
本寂。與佛命脉相通。故稱佛子。理雖頓悟。事必漸
修。故須行道。已來世作佛。據此則真滅尚不應住。
况權滅非真。豈得已而說哉。頌舉濁防難竟。

三頌詳爲分解

追三頌

一頌詳解諸佛權實二頌

詳解自證權實三頌總結以顯道同

初準長行分三。今

闕總結本懷一義。

分二 一頌例上總標二頌分文別列

初頌

義

我有方便力。開示三乘法。○一切諸世尊。皆說一乘道。○今此諸大衆。皆應除疑惑。諸佛語無異。惟一無二乘。

首二句牒上爲例。○次二句正以例明。然開三。旣屬方便。正顯惟爲一乘。諸佛皆說一乘。正顯三是方便。能例所例。義互影也。○今此下勸信標同。言旣知三是方便。不應固執。旣知惟說一乘。宜當諦信。故教以今此大衆。皆應除疑。此勸信也。旣已勸信。欲更詳解。故重示佛語無異。惟一無二。此標同也。

二頌分文別列三 一頌過去佛同二頌未來佛

同三頌現在佛同 初二 一正頌長行二補頌

餘義 初

過去無數劫。無量滅度佛。百千萬億種。

種族姓也

其數不

可量。如是諸世尊。種種緣譬喻。無數方便力。演說諸

法相。○是諸世尊等。皆說一乘法。化無量衆生。令入

於佛道。

初從實施權。○是諸下。會權歸實可知。

二補頌餘義分二 一總標異外權實二逐類別

爲顯示

初

正施權乘之外。更有異外別施。正顯真實之外。更有異外助顯。至下逐類

別示
自見

又諸大聖主。知一切世間。天人群生類。深心之所欲。更以異方便。助顯第一義。

諸大聖主。卽指過去諸佛。一切衆生。若干種心。如來悉知。故云知一切世間等也。異方便者。三乘機外。更及人天三乘教外。更開滅後第一義者。卽衆生本源真心。居有物之先。爲衆義之首。且得之便能成佛。故稱第一。以此乃一切衆生本具正因。雖正因本具。要假緣因助顯。故過去諸佛。更以異外方便而助顯之。言人天微因。滅後少善。積微至著。

聚少成多。時至機熟。皆當成佛。其意蓋以三乘及現在近因爲正顯。人天及滅後遠因爲助顯也。

二逐類別爲顯示三。一佛在受法衆。二佛滅依教衆。三廣記懸記衆。初

若有衆生類。值諸過去佛。若聞法布施。或持戒忍辱。精進禪智等種種修福慧。如是諸人等。皆已成佛道。衆生類。卽上所謂天人群生類也。值佛顯是在世聞法布施等者。謂依教修習。若論六度居三乘之一。本非異外方便。但以機在人天行屬事相。所修福慧盡成有漏。故爲異外方便。借此爲緣。助顯正

因彼時雖屬有漏。漸入無漏。至今皆得道果。故曰如是諸人等。皆已成佛道。

二佛滅依教衆四 一戀佛回心衆二起塔造廟衆三建形畫像衆四供像稱名衆 初

諸佛滅度後。若人善軟心。如是諸衆生。皆已成佛道。法身真常。本來不滅。因衆生見佛久住。憍恣厭怠。方便越世。故云佛滅度後。因佛滅度。無所依怙。始知捨惡修善。化剛爲柔。故云善軟心也。然此衆雖值佛不悟。滅後尚能回心。要知一念善。便爲菩提之基。一念軟。足開萬行之門。故曰如是衆生。皆已

成道。如燈明滅後。倍加精進。求無上道者。是也。

二起塔造廟衆

諸佛滅度已。供養舍利者。起萬億種塔。金銀及玻瓈。碑礫與碼碯。玫瑰琉璃珠。清淨廣嚴飾。莊校於諸塔。或有起石廟。梅檀及沉水。木栴並餘材。甄瓦泥土等。若於曠野中。積土成佛廟。乃至童子戲。聚沙爲佛塔。如是諸人等。皆已成佛道。

供養舍利。應屬人天之機。準今佛滅後。大迦葉言。如來舍利。非我等事。自有國王大臣長者居士等。樂福田者。此言可證。萬億種塔者。人力不齊。塔有

多種。金銀乃至礪礪。注見前文。玫瑰。火齊珠也。徐氏曰。火齊象珠。赤色。起之層層各異。一曰如雲母重疊而開也。琉璃與上玻瓈。雖此方共有。然與西域不同。彼乃自然之質。此以鎔冶而成。故珠謂真珠。非琉璃卽珠也。如上衆寶。其體清淨。類有多種。或莊嚴於外。或修飾於內。故曰清淨廣嚴飾莊點校對。務使文質相當。窳堵凌雲。時見星羅碁布。故云莊校於諸塔。石廟者。以石爲廟。梅檀下。以木等爲廟。檀沉二香。其質最堅。可爲樑棟。有木名檼。可施雕鏤。用爲節稅。餘材不等。爲柱爲椽。各隨其宜。

而用之。輒以爲壁。瓦以覆頂。泥以和合結構。土以積聚培持。此蓋不能起塔而起廟。不能用寶而用土木瓦石者也。曠野者。無人之境。無人之境。而成佛廟者。有二義。一爲營造無地。二令苦途知歸。積土而成者。亦二義。一爲物料維艱。二欲崇質反文。情竇未開。天真未喪。曰童。物欲無累。趣入自得。曰戲。聚沙爲塔者。有二義。一種發。二境感。種發者。由往昔敬佛。種納識田。當此物欲無累之時。發爲現行。故境感者。因見起塔。境會於心。當此趣入自得之際。感爲誠意。故然起塔造廟。本屬福田。積土聚

沙。仍係偶爾。要知一簣之因。能成層崖之勢。初步爲緣。足達千里之程。故曰如是諸人。皆已成道。

三建形畫像衆

若人爲佛故。建立諸形像。刻雕成衆相。皆已成佛道。或以七寶成。鍮石赤白銅。白鐵及鉛錫。鐵木及與泥。或以膠漆布。嚴飾作佛像。如是諸人等。皆已成佛道。彩畫作佛像。白福莊嚴相。自作若使人。皆已成佛道。乃至童子戲。若草木及華。或以指爪甲。而畫作佛像。如是諸人等。漸漸積功德。具足大悲心。皆已成佛道。但化諸菩薩。度脫無量衆。

爲供養佛。建立形像。或慈或威。或定或慧。隨作者心。故云諸也。檀等爲質。刻雕成文。三十二相。相相具足。故云衆也。然法身無相。借相表真。旣信真而造像。自成因而致果。故云皆已成道。七寶成者。金銀屬乎鎔鑄。餘寶亦兼雕琢。鍤石黃銅似金。銅亦金類。故銅字從金從同。色舉二種。故云赤白銅也。白鑞鉛錫。青金之屬。最精者曰白鑞。蜀生者曰鉛。桂楊生者曰錫。流行本多用蠟字。譌也。今正以鑞字。俗以錫鑞合稱者。卽此。鐵有二種。一鎔鑄。二煉錘。今以作像。應屬鎔鑄。木及與泥者。木以爲骨。泥

以爲肉。增胎也。膠漆布三。和合成質。嚴飾莊修。繪畫爲文。脫紗也。此等亦由人力不齊。像設各異。而究其敬佛之心。同出一源。莫不納種爲因。故云皆已成道。彩畫作佛者。或紙或絹。或幣或帛。施以五彩。繪以成像也。相卽三十二相。舉因顯果。故云百福莊嚴。以相相皆因修百福之所感。故自作使人者。因有親疎。皆已成道者。果無同異。筆字多作筆字。蓮師云。譌也。筆從竹。音畢。筆從艸。音委。筆者草木花始生也。約童戲本屬無心。或草或木。及草木始生。拈來便用。故云若草木及筆。爪甲可知。畫作

佛像者。或針於壁。或刺於壤。無論肖與不肖。其本心。謂爲是佛。卽名佛像。由此佛種印於藏識。逢緣漸增。積久成德。故云漸積功德。華嚴行願品云。因於衆生。而起大悲。因於大悲。生菩提心。因菩提心。成等正覺。故云具足大悲。皆成佛道。諸有所作。常爲一事。故云但化菩薩。循循善誘。教不躐等。故能度脫無量。由此觀之。童戲本屬無心。尚乃漸積功德。具足悲心。以至成佛度生。與佛無異。況三乘人等。若能捨權從實。漸積不住。豈童戲之不若乎。其不自信者。乃自悞以自棄耳。

四供像稱名衆

若人於塔廟寶像及畫像以華香幡蓋敬心而供養。若使人作樂擊鼓吹角貝簫笛琴箏篪琵琶鐃銅鈸。如是衆妙音盡持以供養或以歡喜心歌唄頌佛德。乃至一小音皆已成佛道。若人散亂心乃至以一華供養於畫像。漸見無數佛。或有人禮拜或復但合掌。乃至舉一手或復小低頭。以此供養像。漸見無量佛。自成無上道。廣度無數衆。入無餘涅槃。如薪盡火滅。若人散亂心入於塔廟中。一稱南無佛。皆已成佛道。若人於塔廟等者。謂處無論塔之與廟。像無論寶

之與畫物。無論香華之與幡蓋。但出敬心供養。便成勝因。樂有五音十二律。更唱迭和。以爲歌舞八音之節。故使人作之。角貝大螺也。鼓爲衆音之長。螺率群聲之先。故首明之。簫。虞舜所作。編小竹管爲之。參差不齊。象鳳之翼。大者二十三管。長一尺四寸。小者十六管。長一尺二寸。又有無底者。名洞簫。釋義則簫者肅也。謂其聲肅肅然而清也。笛。黃帝使伶倫伐昆谿之竹爲之。凡七孔。又有三孔者。名羌笛。武帝時丘仲所作。長一尺四寸。釋義則笛者滌也。謂滌除邪穢。納之雅正也。琴。神農所作。或

謂伏羲所作。長三尺六寸六分。象朞之日。廣六寸。象六合。五絃。象五行。腰廣四寸。象四時。前廣後狹。象尊卑。上圓下方。象天地。十三暉。象十二月並閏。後文王加少宮少商二絃。或謂文武各加一絃。又後漢蔡邕復加二絃。合前以象九星。釋義則琴者禁也。謂禁制邪淫。以正人心也。箜篌。紂令師延所作。靡靡之樂也。蓋空國之侯所存。故以空侯從竹爲名。琵琶。未詳制人。長三尺五寸。象三才五行四絃。象四時。用手前推曰琵。將手後却曰琶。依鼓時爲名。鐃鈸可知。總結九種。節奏合宜。故曰如是妙。

音。命彼執持。歌咏三寶。故曰盡持供養。寄韻寫懷。
曰歌。梵音清徹曰唄。良以佛德殊勝。見者歡喜。欲
寄韻以寫懷。故託清徹梵音而歌頌之。乃至二句。
有況顯之意。言一音而小。尚已成佛。況彼衆樂供
養。及夫長歌浩頌者哉。散心者。揀非敬意。一華者。
揀非多物。畫像者。揀非寶像。以斯爲緣。漸成勝因。
故能見無數佛。既能見無數佛。則因圓果滿。明知
其已成佛矣。禮拜者。無物可享。以身致敬。合掌者。
不暇作禮。舉手秉心。一手者。攜東抱西。半掌表信。
低頭者。御車乘馬。點首代拜。然此雖禮有全缺。掌

分雙隻。皆本於一心之誠。而佛亦惟納受其心。故曰以此供養像也。漸見二句。明積久成因。以因致果之義。廣度下。明果後興化。化畢潛輝之義。必兼興化及潛輝言者。有警策二乘意也。意謂彼等微因小善。由不自居故。遂致漸見諸佛。成就勝因。卽今成佛度生已畢。汝等聲聞。尚淹滯於化城。良可惜哉。散心入塔廟者。別緣偶至。非誠心也。一稱南無佛者。見相發心。非常念也。正量論引云。昔有採樵者。爲虎所逐。援樹而上。恐不及。念仁耳佛一聲。納種爲因。今值世尊成道。據此則散心念佛。已得

成道之語非妄矣。

問。此中散心稱名。并前草爪畫像。聚沙爲塔等。不過偶爾一念。

童戲無心。豈知有教可依。佛滅依教之衆。何以收此。答。起塔畫像。念佛稱名。如來教有明訓。彼雖偶爾一念。童戲無心。亦因如來遺教展轉蔓及。如從未歷目。并未經耳之事。則聚沙何必爲塔。草爪何必畫像。散心何必稱名。故雖童戲無心。偶爾一念。不知有教可依。乃自然而依之。亦佛教不思議力。有以致之也。

佛滅依教衆竟。

三廣記懸記衆

於諸過去佛在世。或滅後。若有聞是法。皆已成佛道。諸佛在世。有聞是法。指彼法華廣記之衆。諸佛滅後。有聞是法。指彼法華懸記之衆。本經法師品初。廣記現在文云。如是等類。咸於佛前。聞妙法華經。

一偈一句。一念隨喜者。我皆與授記。當得阿耨多
羅三藐三菩提。又懸記未來文云。如來滅度之後。
若有人聞妙法華經。乃至一偈一句。一念隨喜者。
我亦與授阿耨多羅三藐三菩提記。此中云皆已
成道。亦諸佛廣記懸記攝持之力然也。問。異外。權
實。獨見。過
去佛章。現未諸佛。豈無此耶。答。過去易信。故獨
舉之。要知佛佛道同。舉一隅可以三隅反也。 頌
過去佛同竟。

二頌未來佛同。二 一正頌長行。二補頌防難
初

未來諸世尊。其數無有量。是諸如來等。亦方便說法。

法華指掌疏
三
○一切諸如來。以無量方便。度脫諸衆生。入佛無漏智。若有聞法者。無一不成佛。

初從實施權。○一切下。會權歸實。與長行文雖稍異。義實全同。

二補頌防難四 一防何得無一不成難二防不合廣說諸法難三防何必惟爲一乘難四防惟一宜應速說難 初難云。法雖同源。機有千差。若云一聞異解。有成不成。可矣。何得云但有聞法。無不成佛耶。故此防云。

諸佛本誓願。我所行佛道。普欲令衆生。亦同得此道。言諸佛本誓。以自所修諸行。回施衆生。普令同得。

此道是故。但有聞法。俱入如來大願筏中。或遠或近。皆得成佛。亦如富貴貧賤等。多人共登一舟。乘舟力故。莫不皆到彼岸。

二防不合廣說諸法難。

難云。既願同得此道。不合廣說諸法。必說無數法門。

何所爲耶。故此防云。

未來世諸佛。雖說百千億無數諸法門。其實爲一乘。言未來諸佛。雖說無數法門。原其本意。惟爲一乘。仍與本願不相違也。

三防何必惟爲一乘難。

難云。建化門頭。一法不少。廣說既成。權益。何必惟爲

一乘。故此防云。

諸佛兩足尊。知法常無性。佛種從緣起。是故說一乘。
言諸佛兩足之尊。了知諸法本無自性。卽言佛種
亦從緣起。緣起非真。亦無性義也。旣皆無性。惟此
一事爲實。是故惟說一乘。正爲實際理地。一法不
立。捨此無可說故。然此一頌。古德註多深奧。令學
者難於理會。今再釋之。知謂了知。法該情與無情。
情與無情。皆真如隨染緣而起。本屬依他妄現。故
云無性。佛種謂諸佛種性。諸佛種性。雖真如隨淨
緣而起。亦屬依他妄現。故云從緣。一切衆生。不知
此義。妄謂佛及諸法。以爲實有。是於依他法中。更

起徧計。惟諸佛離徧計執。及依他起。故云知也。既知此已。惟餘圓成爲一乘實體。是故惟說一乘。前文所謂惟此一事。實餘二則非真者。益見之矣。

四防惟一宜應速說難。

難云。旣惟爲一乘。宜應速說。諸佛皆久默斯要。抑又

何也。故此防云。

是法住法位。世間相常住。於道場知己。導師方便說。言是一乘之法。卽住諸法位中。旣住諸法位中。則世間相無非真實。故云常住。世間相尚卽常住。何況如來隨宜所說。豈不卽是真實。是知諸佛非真久默斯要。蓋以道場知己爲導師故。引導衆生方

便說一乘耳。若仍有未明。試更釋之。是法卽一乘實相。住猶在也。法位卽諸法自體。諸法自體。彼此各不相到。故名爲位。世間相。仍指諸法自體。爲世間安立之相故。常住。仍指一乘實相。一乘實相。求於去來生死。了不可得故。此中首句。明實法卽在諸法。理卽事也。次句。謂諸法當體實法。事卽理也。了此者。自不以久默。斯要爲難焉。於道下其義。易明。頌未來佛同竟。

三頌現在佛同二 一正頌長行二補頌防問

初

天人所供養。現在十方佛。其數如恒沙。出現於世間。
安隱衆生故。亦說如是法。○知第一寂滅。以方便力
故。雖示種種道。其實爲佛乘。

初頌總標。如來智斷具足。堪爲人天福田。故曰天
人供養。初說三乘。令息化城。後說一乘。令入寶所。
故曰安隱衆生。亦說是法。長行所謂多所饒益。安
樂衆生是也。○知第下頌別明。第一義諦。不可言
宣。故云寂滅。佛知此已。隨衆生說。故云以方便力。
此從實施權也。後二句。會權歸實。可知。

二補頌防問。

恐有問云。後說一乘。令得無上菩提。誠爲安隱。至若人天分段未脫。三乘

變易方熾。何得俱以
安隱稱之。故此防云。

知衆生諸行。深心之所念。過去所習業。欲性精進力。
及諸根利鈍。以種種因緣。譬喻亦言詞。隨應方便說。
言如來知機差別。及根利鈍。隨其所應。方便演說。
令人天不墜惡趣。三乘暫入化城。正隨分以安隱
也。若釋其義者。知之一字。總通下文。行卽三乘所
修諸行。旣修此行。必念茲在茲。銘心不忘。故云深
心所念。此約三乘機性言之。前云衆生心所念。種
種所行道是也。過去習業不同。現在欲性各異。進
力勝者。求生天道。進力劣者。樂着人間。此約人天

機性言之。前云若干諸欲性。先世善惡業是也。諸根利鈍者。三乘人天。次第較之。前利後鈍。可知。佛知此已。爲欲各得安隱。故以種種因緣等方便演說。若不然者。則人天終淪惡趣。三乘不保權果。豈安隱哉。頌詳解諸佛權實竟。

二頌詳解自證權實分二 一正頌長行二補頌

廣演 初

今我亦如是。安隱衆生故。以種種法門。宣示於佛道。
○我以智慧力。知衆生性欲。方便說諸法。皆令得歡喜。

初超頌會權歸實。○我以下追頌從實施權。可知。
二補頌廣演二。一衆生機感。二如來化應。初
舍利弗當知。我以佛眼觀。○見六道衆生。貧窮無福
慧。入生死險道。相續苦不斷。深着於五欲。如犛牛愛
尾。以貪愛自蔽。盲瞋無所見。不求大勢佛。及與斷苦
法。深入諸邪見。以苦欲捨苦。○爲是衆生故。而起大
悲心。

初明所感之佛。欲詳出世因緣。故重呼身子。教以
當知。我揀餘佛。亦順世假立。非執有也。佛眼觀者。
大成云。分別根機。應用法眼。以佛眼圓通。舉勝該

劣故。又四眼入佛。皆名佛眼故。○見六下。明能感之衆。六道衆生。不修勝因。既乏功德莊嚴。故貧而無福。又缺佛法資助。故窮而無慧。無福無慧。輪廻莫出。故趣入生死。生死稱險道者。正量論云。以功名觀之。朝事廟堂。暮謫海嶺。以身命觀之。昨處華堂。今歸黃壤。以升沉觀之。正生人天。復墜惡道。豈非險乎。相續者。既入生死。則輪轉不息。楞嚴云。生死死生。生生死死。如旋火輪。未有休息是也。由生死無休息故。老病逼迫。愛怨別會等。無由解脫。故云苦不斷也。深着五欲等。正明苦不斷義。言六道

衆生所以苦不斷者。蓋以深着五欲。以爲其本耳。如犛牛者。極顯着欲之害。此牛乃西南夷獸名。性愛其尾。卧則以首就尾。由以首就尾。而目爲尾障。

故云貪愛自蔽。由自蔽故。而如盲如瞶。

目無瞳人曰盲。目無

光明。雖伺而殺之。亦無所見也。取此爲喻者。言着

欲衆生。以心就欲。智爲欲蔽。故如醉如癡。傷法身。害慧命。亦所不覺。如彼犛牛。無以異故。佛如導師。能引迷途。故稱大勢。法如正路。能離險道。故稱斷苦。衆生着欲自蔽。故不求也。不求佛。則易惑邪師。不求法。則易陷邪道。由此墮於邪見稠林。堅受不

捨大勢難拔。故云深入。由深入邪見故。或拔髮熏鼻。或塗灰裸形等。妄修無益苦行。欲脫衆苦。是爲以苦捨苦。由此所以苦不斷也。準古德於此。以五濁配釋。今雖竊比。而大同小異。如六道衆生。卽衆生濁。生死相續。卽命濁。前云世世常增長是也。深着五欲。卽煩惱濁。以貪欲爲煩惱之本故。深入邪見。卽見濁。總論四濁積聚。卽刳濁。與前次第不同者。以五濁生起。勢如鈎鎖。互相爲因。前後無定相故。○末二句。結成感義。正以衆生五濁展轉輪迴不息。由此如來出真兆聖。涉俗益物。故曰爲是衆

生起大悲心。衆生機感竟。

二如來化應二 一從實施權二會權歸實 初

二 一從實不得二隱實施權 初三 一三七

思惟二諸天請法三作念無計 初

我始坐道場。觀樹亦經行。於三七日中。思惟如是事。
○我所得智慧。微妙最第一。衆生諸根鈍。著樂癡所
盲。如斯之等類。云何而可度。

初總標思惟。約此番爲化之初。說名爲始。坐通能
所。能坐卽佛。所坐卽道場也。場謂界地。此地。在摩
竭陀國。去泥連河不遠。以如來坐此成道。故名道。

場觀樹者。仰面尋思。經行者。俯首循環。此思惟之
相也。三七日中。思惟是事者。準因果經云。初七思
惟。我法妙無能受者。二七思惟。上中下根。三七思
惟。誰應先聞法。今且寄言總標。故云如是。○我所
下。別明其事。所得智慧。且就實智而言。甚深無量。
二乘莫及。故云微妙第一。諸根卽信等五根。信等
劣弱。遇大便乖。故云鈍也。着樂者。貪着世樂。貪着
世樂。爲癡愛盲其慧眼。由此上中二根。俱叵得矣。
上中叵得。惟餘下流。故曰如斯等類。云何可度。若
以此文。別配三七者。首二句。義當初七思惟。我法

妙無能受者。次二句。義當二七思惟。上中下根。末

二句。義當三七思惟。誰應先聞法。言云何可度者。

正思惟先度人也。

問。三七日中。義當華嚴之時。今但云思惟。豈未說華嚴教耶。答。

正思惟時。卽正說華嚴時。天台所謂雙垂兩相。二始同時者。以此。

二諸天請法

爾時諸梵王。及諸天帝釋。護世四天王。及大自在天。并餘諸天衆。眷屬百千萬。○恭敬合掌禮。請我轉法輪。

初標列諸天。○恭敬下。具儀啟請。此與大通成佛時。諸天請法事同。但此處衆多欲天。彼中儀多供。

養其實彼此皆具。出沒各不同也。

三作念無計

我卽自思惟。若但讚佛乘。衆生沒在苦。不能信是法。破法不信故。墜於三惡道。我寧不說法。疾入於涅槃。自思惟者。欲酌諸天之請。轉思度生之事也。準前三七日中。惟是思惟。今云若但讚佛乘。似乎從前已讚。益信正思惟時。卽正說華嚴時耳。衆生沒在苦者。五濁八苦。如海無涯。沒溺其中。不能自出。故出苦尚不可得。豈信成佛。故云不信是法。不信是法故。反謗佛說。是爲破法。破法因緣。必墮三途。是

以不信之故墜於三惡道也。如是則說法有損。不如不說。住世無益。不如不住。故云寧不說法。疾入涅槃。此亦如來假言傷感。如仲尼浮海之嘆無異。從實不得竟。

二隱實施權三 一尋念方便二諸佛慰喻三正施權乘 初

尋念過去佛所行方便力。我今所得道亦應說三乘。出世本爲度生。無機寧忍遽棄。欲效先佛循序方便。故尋念也。既尋念已。理應憲章。故云我今所得亦應說三。

二諸佛慰喻

作是思惟時。十方佛皆現。梵音慰喻我。善哉釋迦文
第一之導師。得是無上法。隨諸一切佛。而用方便力。
○我等亦皆得最妙第一法。爲諸衆生類。分別說三
乘。少智樂小法。不自信作佛。是故以方便。分別說諸
果。雖復說三乘。但爲教菩薩。

初稱讚慰喻。思惟卽尋念也。尋念過去。而十方佛
現者。顯佛佛道同故。慰安慰喻。順喻。謂諸佛恐其
捨權。以梵音聲。安慰而順喻之。此係如來自述。故
云我也。如來能法先覺。能順機宜。故諸佛稱以善

哉。釋迦文者。按諡法。道德博聞曰文。慈惠愛民曰文。釋迦有自利利他之德。可當此稱。又稱以第一導師者。以如來自證無上。善接群機。於諸導師之中。最爲第一。故得是無上等。正明如來自證無上。善接群機。釋上第一導師義也。○我等下。作證慰喻。言不惟汝得無上。我亦皆得最妙第一之法。不惟汝用方便。我亦爲諸衆類。分別演說三乘。但我說三乘。原爲少智樂小。不信作佛。故以方便分別。說諸權果。要知雖復說三。但教菩薩。汝後若能如我所行者。則方便亦何傷於真實。且莫作寧不說。

法疾入涅槃想也。

三正施權乘三 一申屈轉念二先度五人三總

結防問 初

舍利弗當知。我聞聖師子。深淨微妙音。稱南無諸佛。
復作如是念。我出濁惡世。如諸佛所說。我亦隨順行。
欲敘昔態。故重呼其名。教以當知。聖師子。卽指十
方諸佛。音卽諸佛慰喻之音。迦陵仙梵。超出一切。
故稱深淨微妙。南無諸佛。宜作慨聲讀之。意謂若
不施權。則違諸佛慰喻。若施權乘。又違出世本懷。
當此無可奈何之際。故稱南無諸佛。略以申其委。

法華指掌疏
三
曲難言之意。旣申屈已。轉念隨順諸佛。故云復作是念。言我出濁世者。自知時不可謬。且有諸佛慰喻。所說諄諄。情難違拒。理宜遵從。故云如諸佛說。我亦隨行。總顯從實施權。非得已也。

二先度五人

思惟是事已。卽趣波羅奈。諸法寂滅相。不可以言宣。以方便力故。爲五比丘說。

思惟是事已者。施權意決。卽趣波羅奈者。屈身就機。以有五比丘等。在彼屬境鹿野苑中。故波羅奈在中印土境。義翻江繞城婆沙云。中印土境有河。

名波羅奈。去其不遠。造立王城。卽依河爲名也。諸法寂滅。不可言宣者。言如來趣波羅奈。本爲說法。其奈諸法本自寂滅。離於言說等相。不可以言語而宣說之。設於此。不有方便。必將同如匏瓜。繫而不食矣。佛不如是。故能以方便力。爲五比丘說也。五比丘者。一陳如。二十力迦葉。爲母族二人。三阿濕波。四波提。五摩訶男俱利。爲父族三人。佛初入山時。父王勅彼伴修。後不耐苦行。自奔鹿苑。各修異道。佛於成道三七日後。欲度阿藍迦藍。鬱頭藍弗。不得。因念五人。宜先得度。故往度之。所謂悲二

仙而不遇雷音喜五人而堪從法化是也。

三總結防問

是名轉法輪。便有涅槃音。及以阿羅漢。法僧差別名。
○從久遠劫來。讚示涅槃法。生死苦永盡。我常如是
說。

初總結機教。法指四諦。以能摧滅見思。運至涅槃。
故名爲輪。佛以此法。轉入機心。故名轉也。是名者。
謂實際理地。本無法輪可轉。言轉輪者。亦惟是其
名耳。涅槃音。能被教也。阿羅漢。所被機也。便有者。
涅槃非真。羅漢假名。言羅漢。言涅槃者。亦惟方便。

有耳。又是名便有。皆承上結歸之詞。謂如來自鹿苑一唱。是卽名爲轉輪。從此便有涅槃之教。及羅漢之機也。既有涅槃之教。及羅漢之機。是於佛寶之外。更添法寶僧寶差別名目。此三寶之所由始也。○從久下預防問難。恐有難云。方便之法。亦有涅槃音耶。故以上二句防之。言佛從久遠劫來。卽爲彼等讚示涅槃之法。權因久成。故今初轉法輪。卽爲演說涅槃音也。恐又難云。無學之位。亦非驟及。何故初轉法輪。便有羅漢名耶。故以下二句防之。言彼等於分段生死之苦業已永盡。我於多劫已來。常以如是之言。稱說於彼。故今初轉法輪。卽許

成就羅漢名也。

問。轉照三會。此科義當初轉。中轉後轉。何不具耶。答。文雖不具。義必

有之。準下文既稱佛子。則中經方等般若可知。從實施權竟。

二會權歸實三

一機熟時至二等。賜一乘三聞。

法獲益 初

舍利弗當知。我見佛子等。志求佛道者。無量千萬億。咸以恭敬心。皆來至佛所。曾從諸佛聞。方便所說法。○我卽作是念。如來所以出。爲說佛慧故。今正是其時。

初根機已熟。權不終權。恐身子未契此旨。故勅以當知。既經方等般若。根機已熟。故以佛子稱之。將

以大法饒益。故云見也。志求佛道句。卽成就大志。
自鄙先心之義。無量句。通指三根。如前云求佛諸
菩薩。大數有八萬。乃至云我等千二百。及餘求佛
者是也。咸以二句。正明志求。如前云佛口所生子。
合掌瞻仰待。乃至云皆一心合掌。欲聽受佛語是
也。曾從二句。極顯根熟。如前云曾見諸佛。諸根猛
利。乃至云佛已曾世世教化如是等是也。又上云
從久遠劫來。讚示涅槃法。則諸佛卽是釋迦。但約
多劫以至今生。故名爲諸。言佛自多劫以至今生。
憐其退大向小。常以權宗接引。故云聞方便說。○

我卽下時節已至。卽作是念者。旣令保證權果。還憶出世本懷也。出世本懷。惟爲一事。故曰如來所以出。爲說佛慧故。是時者。對非時言。如阿含得少爲足。非時也。方等猶在門外。非時也。般若無希一食。非時也。今乃復經少時。漸以通泰。故云是時機熟時至竟。

二等賜一乘二 一預防問難二正明等賜 初

難云。旣是其時。卽當速說。必待三請後說。復何意耶。故此防云。

舍利弗當知。鈍根小智人。著相憍慢者。不能信是法。教以當知者。恐其有疑故。鈍根小智。指實行聲聞。

著相。指下劣凡夫。憍慢。指實行上慢。然鈍根則固蔽權宗。小智則不樂大法。著相則滯窒有漏。憍慢則妨礙進聞。故於是法皆不能信。所以必待三請而後說也。

二正明等賜

今我喜無畏。於諸菩薩中。正直捨方便。但說無上道。自五千退席。斥過結勸以來。去者去。悔者悔。並無如向所說。鈍根小智等流。故云喜無畏也。菩薩者。根利智大。解脫虛心。於是衆中。不須偏用權巧。不用曲順機宜。故云正直捨方便。但說無上道也。等

賜一乘竟。三聞法獲益

菩薩聞是法。疑網皆已除。○千二百羅漢。悉亦當作佛。

初二句。正許上根斷疑。菩薩暗指身子等一類上根之機。疑有二種。一近疑。謂初聞歎智。不知何因何緣。二遠疑。謂昔見授記。不知爲失不失。二疑交攻。不能自釋。故云疑網。今聞是法。遠近俱斷。故云皆除。○下二句。懸示中下成佛。羅漢總指中下之機。言菩薩疑網已除。自當成佛。若中下之機。如千二百羅漢之流。雖未卽得除疑。佛有方便。究竟與

記。悉亦當作佛也。頌詳解自證權實竟。

三頌總結以顯道同

義頌

如三世諸佛說法之儀式。○我今亦如是說無分別法。

上二句結諸佛權實儀式猶軌則也。言從實施權會權歸實爲三世不易之軌則故。○下二句結自證權實亦如是者。謂倣彼諸佛儀式也。旣倣彼諸佛儀式則雖說權乘會歸惟爲一事。故云無分別法也。頌正爲分解竟。

三頌讚法勸信

追頌

二一正頌長行二補頌防難

初二 一頌讚法舉喻二頌勸信無虛

初追頌
中廣

頌

諸佛興出世。懸遠值遇難。正使出於世。說是法復難。
無量無數劫。聞是法亦難。能聽是法者。斯人亦復難。
譬如優曇華。一切皆愛樂。天人所希有。時時乃一出。
準化城品云。一百八十劫。空過無有佛。又云。於昔
無量劫。空過無有佛等。足證懸遠義也。妙嚴品云。
佛難得值。如優曇華。又如一眼之龜。值浮木孔。又
古偈云。佛在世時我沉淪。我得人身佛滅度等。足
證值難義也。正使猶縱令也。縱令有佛出世。而又

久默斯要。不務速說。故云說是復難。聞謂但領其文。無量無數劫猶難者。如此方自迦葉至釋迦。相去非少時矣。及開演此經。尚有五千退席等。已可見也。聽與聞同。能字有揀別義。蓋必兼解其義。乃爲能聽也。斯人亦復難者。如舍利智稱第一。佛尚謂其以信得入。未便深許。餘可知矣。譬如優曇者。借喻顯人。一切愛樂者。喻斯人衆所敬仰。天人希有者。喻斯人世不多得。時時一出者。喻斯人時不多見。又此雖借喻顯人。實卽因人顯法。與長行法如優曇。似異實同。

二頌勸信無虛

義頌

聞法歡喜讚。乃至發一言。則爲已供養。一切三世佛。是人甚希有。過於優曇華。○汝等勿有疑。○我爲諸法王。普告諸大衆。但以一乘道。教化諸菩薩。無聲聞弟子。汝等舍利弗。聲聞及菩薩。當知是妙法。諸佛之秘要。

初極顯信難。聞法歡喜者。自信作佛故。喜而復讚者。冀他聽聞故。乃至一言讚歎。便爲供養三世佛者。以展轉傳聞。能令諸佛法身不斷。慧命常存故。是人甚希有者。以此法人多怨嫉。歡喜者希。且又

發言稱讚。故云甚也。過於優曇者。言上來聞聽。但屬自利。已如優曇。此稱讚更兼利他。故云過也。又過於優曇。雖顯能讚人難。而彼人之所以發言稱讚者。由於歡喜自信。正極顯自信之爲難耳。○汝等句。直言勸信。由自信者難。故直以勿疑勸之。○我爲下。曲顯不虛。我爲法王者。顯能說不虛。以若有虛妄。則愧稱法王矣。普告大衆者。顯所說不虛。以若有虛妄。則難以普告矣。但以一乘等者。正明所說之事。此約自所說。以曲顯不虛義也。汝等舍利弗。呼大衆。及當機也。聲聞及菩薩。教中下。并上。

根也。恐其不能諦信。故勅以當知。是妙法。卽指今之所說。非同權言易出。故云諸佛秘要。旣諸佛秘爲心要。自非妄言。此約諸佛所秘。以曲顯不虛義也。由此觀之。則所說皆無虛妄。有言盡是真實。此而不信。則無法可信耳。正頌長行竟。

二補頌防難二 一防諸佛何故同秘難二防如

來何故普告難

初難云。今佛普告。應是大公無私之理。諸佛秘爲心要。何所

爲耶。故
此防云。

以五濁惡世。但樂著諸欲。如是等衆生。終不求佛道。當來世惡人。聞佛說一乘。迷惑不信受。破法墮惡道。

言過現諸佛。因出濁世。當來諸佛。或值惡人。秘是法爲心要。非得已也。若詳釋者。五濁衆生。五根粘滯五塵。如蠅就穢。故云但著諸欲。如是衆生。惟知有漏因果。無出世心。故云不求佛道。當來指未來佛時。未來衆生。剛強難化。故稱惡人。旣稱惡人。豈能信受大法。故雖聞說一乘。亦迷惑不信受也。以不信受故。當起破法罪業因緣。必墮惡道無疑。由此觀之。則諸佛秘爲心要者。亦緣不得其人。若果是其人。則密在汝邊。諸佛豈私已哉。

二防如來何故普告難。

難云。諸佛同秘。應是教外別傳之宗。今日普告大衆。

又何所爲耶。
故此防云。

有慚愧清淨。志求佛道者。當爲如是等。廣讚一乘道。
言今日如來普告大衆者。皆以時至機熟。有諸知
慚識愧。清淨求道之人。理當爲彼廣讚一乘。若不
然者。諸佛豈妄授哉。若詳釋者。慚謂自慚。謂自慚
同入法性。獨滯小乘故。愧謂愧人。謂愧人議爲焦
芽。呵爲敗種故。清淨者。諸念不雜。求道者。一心向
上。如是等人。真爲道器。故當爲彼廣讚一乘。所謂
機感盈前。不得不說是也。頌讚法勸信竟。

四頌斥過結勸

約義
畧頌

舍利弗當知。諸佛法如是。以萬億方便。隨宜而說法。其不習學者。不能曉了此。○汝等既已知。諸佛世之師。隨宜方便事。無復諸疑惑。心生大歡喜。自知當作佛。

初合頌兩番斥過。欲斥有過之衆。故重呼當機以告之。惟爲一乘。前已備聞。故直教以當知。諸佛法如是也。法既如是。則從前所用萬億方便。皆隨順機宜而說。非究竟矣。不習學者。謂不曾習學方便之法。如長行所謂非佛弟子。乃至是增上慢人等。言此衆既不曾習學。又焉能曉了。是諸佛隨宜說。

乎。故直斥以不能曉了此也。準長行乃指過斥人。故以不聞不知不復志求者爲非佛弟子。非阿羅漢。非辟支佛。是增上慢。而此中乃指人斥過。故以不習學者爲不能曉了。是佛隨宜所說。特文偈變換之異。而義無殊也。○汝等下義頌結勸信受。言上來不能曉了者。固不必論矣。今汝等旣已了知諸佛世尊爲世間之師。隨宜所說皆方便之事。相應於此一乘深法。無復諸疑惑矣。無復者。猶言無得更犯之義。心生大歡喜。自知當作佛者。旣誠以勿疑。又勸以歡喜自信。所以然者。以諸佛出世。懸

遠值難。今已值矣。正使出世。說是法難。今已說矣。
無量數劫。聞是法難。今已聞矣。聞而能聽。斯人復
難。今已能矣。惟少直下承當。歡喜自信。故作如是
結勸。準後身子領解。文云。我心大歡喜。疑悔永已
盡。安住實智中。我定當作佛。正應乎此。問。自許說誠聽以來。
數數勸信。卽屬佛意。亦覺重疊。而疏中處處設難。
既出私測。寧逃穿鑿。或亦別有所說。以解重疊。及
穿鑿之議乎。答。權執難破。真信難生。真信難生。故
旋信旋疑。故致如來數數勸信。權執難破。故旋破
旋起。故致如來處處防難。然則數數勸信者。固如
來之婆心。處處設難者。亦註家之點眼。語切不厭
重疊。義正豈是穿鑿哉。如來說法竟。

法華指掌疏卷一之下

終

音釋

諉

女悲切音搗累及也

斃

毘祭切音敝踏也前覆也

擎

渠京切音榮架也

薩婆

若

此云

一切智是諸佛之心

畫一

伏羲畫一陽奇之數無二無別也

蝸牛

陵螺也上古華切音瓜

驚

亡遇切音務馳驚也

斬

居攢切音近制其行也

渠之切音其

綵也極也

蔡邕

人名下於容切音雍

驟

鉏救切音縑速疾也

室

陟栗切音

也

信士薛士傑捐銀二十兩 高國盛捐銀五兩

韓玉璋捐銀十兩 韓紹賢捐銀五兩

寶泉局大悲獻音勝會

比丘同合 通和

信士張承業 唐世哲 劉文琰 姜國棟

韓紹齡 羅廷弼 楊洪 閻君保

張國樑 李芝蘭 楊源 李德祥

周德興 陳國相 高成 田國興

王世榮 李良化 永福 李士貴


韓謨 李良芳 閻守仁 張起鳳

盛文德 張景華 陳耀宗 秦耀宗

唐世鉉 張士英 阮士傑

合會緇素共捐銀三十兩

敬刊法華指掌疏一卷願現在福壽綿長當來解
行圓滿



盛文德

張景華

陳紹宗

李耀宗

唐世鑑

張士英

阮士傑

胡長壽

敬刊

法華指掌疏

一卷

願現在

福壽綿長

解

行圖

